

黃山志定本

黃山志定本卷七

吳山僧弘濟益然閱定

原姓汪名沐日字拱光

新安閔麟閣賓連纂次

同學程 守非二

吳 綺蘭次

吳聖修專公

江銘勲尙一

趙吉士天羽

汪士鉉扶晨

黃元治自先

汪 楫舟次

江 閻辰六

程 謙山尊

吳 苑楞香

吳之騅耳公參閱

賦詩志

明下

江東之

黃山

高峰矗拔迴僊城山色龍嵒映日明丹鼎不隨人世換
黃雲長共海潮平思窮地軸巖何轉嘯徹天關虎豹驚
一介孤臣心未了白雲多處氣縱橫

江世東

游黃山

軒皇曾此駐靈扉藥竈丹爐隱翠微絕頂鶴尋雲壁上
遙空龍憶鼎湖歸人傳山有霞千色我愛身逢玉四圍
何日蓮峯容結屋浮丘相伴自忘機

顧錫疇

御泉庵

高皇曾此耀鸞旌
何緣紀聖明日月照臨成勝事
至今僧衆罷租征

鄱陽一戰破陳兵
定鼎金陵漸北平
駐蹕新安雙嶺下
萬年欣覩御泉清

程嘉燾

題畫雪景送照師歸黃山喝石居

去年除夕師以
余疾出山茲感

舊作歌

蓮花峰腰三丈雪飛鳥無聲人跡絕山僧冒寒晨出山
腳踏層冰跣屣裂遠來問疾剛一笑寒飈結花如吐屑
紙窓竹屋歲聿除駒隙光陰催電掣故人遊山恨不俱
愁我無緣上截業

海虞公會語
照師云云

八十衰翁老叻力賈勇

攀躋強得得前推後挽賴照師振肘牽裾抱腰褰穿岫
渡壑捫确犖十步回頭五步息忽然坐我天門問自怪
憑空生羽翼此時日下千崖赤相去牛鳴望喝石崖松
龍拏互相引林石人形如欲嚇庵前矮垣齊及肩道上
清泉纔沒跣仰頭天都五千仞俯瞰蓮溝十萬尺童童

蒼松披羽蓋
羃羃楓林排畫壁
廿年茅齋落夢境
方丈香厨共禪席
牀下地爐火長活
龕裏燈明磬方寂
八月山寒苦風雨
有客夜投同軟語
山芋煨來手自剝
秋芽焙出還親煮
老人擁衾日僵臥
小師蓮經晨夕課
開門忽報下方晴
悄悄空中靈鵲過

同吳無着雨夜宿照師喝石居題畫

風雨茅庵一宿同
了然身世是虛空
休言此畫模糊樣
原在蓮花光影中

黃 奐

桃花源贈潘次公

萬樹丹霞夾水濱，攢峰峭壁鎖春雲。
僊源千載無人問，溪上漁郎莫是君。

宿蓮花庵畱寄鄭無著

峰蓮簇簇擁秋窓，一瓣花中建法幢。
莫怪龕前雲盡濕，石潭新有白龍降。

千折瑤崖萬折雲，看山十日不逢君。
何時對月分瑤席，乞篆天都秘簡文。

王千凡自天都貽石一片

路通蓮峰六六花採將片石付山家怪來半榻生奇氣
帶得軒轅鼎內霞

黃道周

辭黃山

就俘以來誼在必死生平所歷黃山白嶽匡廬九華
浮丘龍首穹窿五墓洞庭三茅天目徑山西陵宛委
天台雁宕羅浮懷玉一十八翁要當一一謝之生死
千秋未必再晤風雷楮墨載其精神亦使山靈聞之
謂吾不薄也

交臂遂相失徘徊霧雨中悲猿如葉類笑客不從容
不沐神瀍泉不咽丹砂飯浩蕩遺雲舟舄然無畔岸
亦是吾家擊神物不可譜頂髻在心眸一一屈指數
新嶺非不高乃不得相見今有青鳥箋欲寄南歸鴈

思在黃海

丹砂峯下煉魔堂千輩緇衣繞法塲勝事會須消歇過
空山面壁自清涼

一坳淡僻亦奇峯似得家庭環照中松障上頭看不到
別須危苦與相從

割裂岱華又幾年雲松無處不焦然天翁刻意消青鬢
畱取巖頑照白顛

筍蕨茅茨清福多馬蹄豈復瞻青莎乘涼一洗溫砂水
不爲身輕欲解痾

名城墮後已闌干合與嬉猿共破寒瘦竹一枝輕過鳥
千山鐘鼓報真官

竹節投書石几閒肅鸞馴虎一時刪可須閉眼三千日
少從雷霆一往還

方一藻

遊黃山

巾駕附靈嶽振策凌紫虛逍遙揖列僊瀆滌撈蓬壺怪
石蒸層雲碧嶽倚精廬仄徑磴屢絕連巖望轉舒虛疑
造化苦神腕幾雕刻平生五嶽願夢想結良圖茲遊愜
心目浩蕩滌塵拘何當餌靈液一鶴跨天都

釋弘忍

望三十六峰

雨洗山根白淨如寒夜川盈盈清霧中諸峰立我前石
色撐春青高處侵霏烟昨日遠江外舟人識已先幽幽

翳鳴禽鏗鏗聞落泉巧樸不自陳一色藏其巔欲記蒼
松根對此長朝眠

吳可文

黃山作

接天寒翠隱僊關悵望靈區莫可攀每向雨餘覘霰
時從松際聽潺湲幻來祇覺都無我奇處翻疑不是山
擬築茅茨傍丹壑門前時看海雲閒

同余無隱坐迴瀾石遇雨

峯變暮烟迷壑轉秋灘咽凍雨一時過迴風舞亂雪

鄭汝敏

觀鋪海

只聞海中有高山不聞山中有海子只知黃河之水天
上來不知黃山之海天上起乍驚白練亘遙空濤奔日
暗山川死長風鼓盪詫神奇老蛟觸碎冰霜髓前見幾
千里今見幾萬里天河不在天大地皆成水雲散飛光
湧碧霄回看一寺蒼松裏

周 鑑

桃花源

大壑出天上玲瓏下玉澌峰高落日蚤草靜暮雲遲故
地一千里寒風十二時遊人有至性山鬼不須欺

兜率庵題壁

茲山能骨立對爾見平生聞道猿猶泣我來一杖行

徐頴

觀鄭超宗藏天都雲海圖

日月行腹天挂角拔地蓮花青倒躋人烟橫絕有此奇
高懸多恐生雷雹我昔曾宿軒轅宮風吹鐵瓦同飛蓬
前峰月寒猿鳥睡遂有玉斧開鴻濛始疑錢塘魂抉目

餘氣猶不平怒濤卷起秋無聲又如嵯州甜雪不可致
攬衣一掬空英英三十六峰若游泳山僧定眼如石鏡
芙蓉一一皆可名自云變見非真性茫茫雲海幾隔年
思之每欲白日眠今日披圖恍入夢置身忽落天都巔
神氣流兮松露泣雲容裔兮海濤濤茆堂石几相與清
白光瀉壁驚飛電琉璃作積水犀籤願君什襲藏之善
出則爲雨潛爲龍塵埃五色那能辨

拂水長松歌附錄

自注去黃山百餘里在歙州

巖鎮之後溪

軒轅藥房杵臼空苔爐不見宿火紅爐中所遺古松
子散在人間作風雨鍊丹之源活且溪何不在山洗

賦詩

塵土緣知種自石崖生倒拂橫披性所成湘雲片片
愛水宿竹筏溪高集於腹役如峽中猿接臂下飲迫
之不聞喧蕩如剡溪柳二月柔風不教吹到手鱗皮
鬚葉無所殊譬之耳目神理或異形則俱凡禽鐵羽
不肯住老鶴貪睡巢其枯叶嗟乎豐木自長松自老
看松之人等芳草主人既醉常閉門此意難與醒者
道

孫 晉

黃山浴湯泉

遊事歷歲秋高天白日速策杖入寒林息駕山之麓仰
瞻壁間詩苔封不堪讀蘿月浸空階松濤響幽谷問徑
晚烟迷欲效步兵哭沙門前致辭且就招提宿何以永

不宵攜來酒一斛連林無俗人夢醒風敲竹鳥鳴曙色
開趣就溫泉沐丹砂蓄此間山靈有淡祝欲覲軒皇顏
先洗塵埃目爲解芰荷裳波光淡盈掬炎涼一水分坐
久媚幽獨強起誓再遊築室從此卜

宿文殊院觀鋪海

白霧霏霏雨不歇青山忽銜半邊月翠壁苔蘚繡虎紋
千巖萬壑鋪溟渤我欲跨海無長虹遙看彼岸薄窮髮
日脚垂垂映彩霞島嶼微茫出還沒夜半重登立雪臺
芙蓉的歷九天開寒光五色盪精魄彷彿僊人騎鶴來

須臾萬里吹長風松濤石上起蟠龍山中輕雷聲殷殷
簷端細露水溶溶山前山後海平分令人應接不辭勤
欲借玉女雙剪刀掠取長空一片雲海外青螺數點浮
萬頃琉璃一曉收淡粧濃抹都難似此際誰能紀勝遊
一回一叫眠不得恍惚遊僊看曙色

登始信峯觀石筍在師子林散花陽諸勝

始信峯頭雲可掬道人已去存茅屋洞口虬枝駕鵲橋
蒼天已近白日速晴巒斜挂瀑千縷陰壑橫鋪錦萬簇
茵苔葉間金芙蓉奇峯何止三十六倏忽二儀闕精光

失卻黃山真面目，剛來拍手叫秋旻。
搗摹名象渾如真，如此奇形兼異境。
山靈豈肯多示人。

慈光寺大殿落成寄懷黃子升

黃海奇峰插霄漢，天都蓮花翠巖巖。
泉聲沸遶丹巖，慈光利竿聳天半。
當年檀護動宮闈，鑄金爲像裝珠璣。
中使奉詔到丘壑，雞園鹿苑生光輝。
樓閣蹉跎鞠荆棘，金殿苔生人不識。
鐘磬依然給孤園，法幢闇澹少顏色。
我昔策杖躡層巒，駐足踟躕古寺門。
恨不手植多寶塔，琳宮貝闕飄錦旛。
忽逢布金長者來，手開壺芥雲霞開。

時候因緣信有待圓澤三生何疑猜碧瓦翬飛玉作柱
法苑莊嚴亘今古影布祇樹林裏雲花飛靈鷲峰頭雨
方內轟傳功德大我尤合掌高聲和香煙不負名山靈
至今夢寐橫雲青

黃山道中

驅車永日鏡中遊傍岸清泉足下流塵到山陰無世味
香生蔓草亦芳洲村前古樹千重碧嶺上閒雲一點浮
晚閑孤村談逸事砧聲何處動人愁

初抵黃山湯寺

參差翠岫插雲中
雨洗芙蓉艷許同
自是僊居通帝座
誰知鬼斧奪天工
娟娟月出千峰曉
謾謾松生萬壑風
顧影却憐塵土面
十年身到梵王宮

湯寺晨起聽泉

五夜鳴泉聽不窮
夢回疑雨復疑風
時傾倦鼎飛丹液
孰挽銀河倒碧空
壁上詩篇懸日月
雲中劍佩倚崆峒
朝來獨步寒潭側
長恐青天起白龍

繇老人峰陟文殊院

千盤萬折入天門
獅象當關叩九閭
撲面雲霞知有意

摩崖草木似無根如聞僊樂遲青鳥欲見精靈憶白猿
直至文殊高臥處老人俯視又兒孫

吳孔嘉

紀遊

青谿環翠竹一望水之濱雨氣迎風合山容隔岸分
籃輿侵薄暮村釀帶微醺去住原無定峰頭宿白雲
投宿依僧舍蕭然環堵時昔年曾避迹今日再題詩
佛古香烟冷雲淡鐘磬遲黃梁今已熟不待五更炊

吳運嘉

石牀峯

山中誰共曩遊糧玉女峯頭掃石牀祇恐夜深初醉醒
滿天風露不禁涼

吳廷簡

朱砂庵觀木本蓮花

龍象天家錫瑤花佛地來池將空作水根以樹爲臺種
異難尋偶香嚴不濫開琳宮欣一晤早結往生胎

登蓮花峯絕頂

懸梯幾度駕巔屹險盡勞身得大觀人立天心風習習

僧穿地肺路盤盤眼中滄海盃盃小衣上白雲冰玉寒
九品池邊吾輩事軒轅寧復戀餘丹

登始信峰

亦知理外事難窮想見成時竭鬼工整似五丁曾鑿斷
橋懸獨木竟凌空陽香天女花爭散可憫僊人局未終
莫慮結茆無取汲雨餘先控飲江虹

李逢申

慈光寺

神皇聖孝奉慈躬寶像青蓮淡谷中貝葉親煩天母製

龍幢遠出大明宮
岩窈鶯嶺懸蘿月
寂寞松崖怪瀑風
獨使小臣頻下淚
常披秋草悞西東

方士翊

師于林同朱白民弟若繩作

杖策恣幽討盤紆望祗嶺
經行愛夕陽絕壁還延佇
衣凌鳥道摩崖躋險步
虬松踞怪石斗閣安巢住
何來清磬發風雨空山暮
晨起躡西巔白雲千壑乳
峰峰攢積雪光搖心眼
驚候爲溟渤觀一葦不得渡
將期汗漫遊恍然慙茲遇
且養看山目將尋松谷路

登蓮花峯

突地蓮花瓣瓣飛巧將花片定僧扉
鳥啣松子數蒼壁人學猢猻度翠微
逕絕有時雲作棧峯欹遙指石爲機
飄飄高頂知何似一派光明湛落暉

師子林見月

清磬響空山月送蒲團入淺林
如有人石丈松間立方士亮

雨宿鄴鉢禪院贈無易上人

入門釋輶策境境似相關
十二年前雨崎嶇天外山泉

奔秋澗急徑倚暮松寒所幸廬山遠無慚昔道安

吳階

海子

峯下溪壑遇陰晦時忽作雲霧決滌浩森氣結蜃樓
恍如滄海

曦輪匿影白雲封大地積水行剌空麻姑接待見清淺
三見清淺剌那中霓滌浩蕩山頭起杳靄澎湃松壑裏
潛蛟怒掣金鎖開噴薄瀾漫天與水貝闕珠宮如等閒
長鯨巨鯨劈天闕忽驚落日洪濤上又見流雲駭浪間

欲駕鼉梁三島去徐市童男在何處之眾移將天都下
巨靈神斧削孤嶼吐月兮浴星驅雷兮鞭霆泛桂舟兮
無楫乘長風兮杳冥崑尤奮戟馮夷舞風后雄威真跋
扈恍惚滅沒成巨浸秦皇漢武不敢渡須臾矧散霽色
新蜃樓失卻萬峯青頽波奔瀾何所有東海行復揚清
塵

嗣按張季珙云前後海以光明頂爲界頂以南諸峯
屬新安歙縣界爲前海頂以北諸峯屬宣州太平縣
界爲後海頂下又名天牕海子形稍平坦山中之建
廊也及考圖經暨徽州府志欽志汪涇新安郡乘賦
注咸謂翠微僊都望僊三峯屬太平餘峯俱屬歙縣
則太平於黃山諸峯僅得什一耳

朱鷺

黃山松

松無五仞高矮者二三尺數枝或橫畝平翠可布席
咄咄離奇者石端絕土滋根大於其本短幹特脩枝
高既不盈尋大亦不盈斗霜蘚封蒼膚糾結百重厚
一松王一石蒼占看不厭便足了一生琬骨於此寔
松饒太古色一峰千幹奇盡從皺嶂布強半俯空數
何處松奇絕文殊曲磴開丹臺東過去始信接西來
原不依土生那得遷土活寄語買松人莫賺人來找

光明頂雲海

看雲共策光明頂
布壑彌原亂涌濤
四望真成銀色海
青青獨露幾峰高

楊補

擾龍松六章

擾龍松破一峰以孕身上出
峯頂踞而舒蓋橫枝復
曳一臂長不下數丈鱗甲
鱗額之異居然可作衆松
隆華矣羣峯敢不拱而臣事之

於戲爾生有於鴻濛石體既備爾曷以功
若峯爾母

腹猶嫫之峰不得尊爾巔踞之 爾壽則天爾身則峯
詰曲癸牙一臂當空 翦翦者鬣時持并刀霜霞日星
爾碧乃骨 率土不隸後天無鄰曰霸曰王千峯來賓
登則戴之遙則禮之雲雷冥冥誰能測之

文殊院運中

奇不淺示人吾固知其以及此想全別妄我絲未擬壁
面青攬人絕復無生理一木廼梁之梯空升竇底高下
敢遑及此中飮甘旨嚙嗟不得前難爲後來矣

光明頂日華

有小序

烟午忽月非月也乃日斂芒呈體全似月耳有物橫
入圓規如傾狀久至過半乃分纖日端纚纚作金縷
光熾空光復遠下別峰丹紫萬狀而近頂則猶夫烟
霧也衆觀愕然莫知所名以有類乎月之華也因名
之華而係以詩是爲十六日

風雲互呼吸構象殊無端白日自有常忽焉示月觀有
物若憑之傾規將半殘斯須作金緯析月不得完其光
下遠際幻彩隨羣巒顧我衣袂間濃靄仍漫漫衆驚不
暇論但云重遊難吾技烟雲爲其技正未殫

登始信峰俯瞰方太史與兩衲商巢焉詩以紀之
數日唯一登不知所歷上孤峻旣在眼勇造必巔向及
巔反下視始悟輕生安巖根盡剝立其深不及望中與
當何如山於斯肺腑不能翼以下乃欲巢而傍相顧曰
僧宜我亦奚多讓

飛來峯

何來一片雲化石棲峯而百丈無皺痕趾虛通一線欹
傾不自安非根豈能眷翼翼半欲去如懷故山戀側身
臨其前瞑目骨已戰相戒勿爾觸下久意始善

石筍柱

所人轉竊紗與庭穿曲房峰情肆奇譎爲象不可方分
身恆沙數析骨敲琳瑯萬戟倚青天寒生六月霜各具
喜怒情或裸或冠裳隨人指所似名能巧相當必有松
媚之如花簪觀柱咄咄斯怪觀真成兒戲場

天橋

高力盡巖嶺怒肋騰虛空勢更不得上引而爲飛虹中
斷巧相續懸尾如搖風青天挂環影雪爪難停蹤區區
表石梁猶與世人通

下松谷回望石筍

憑高日摩頂羣峰指掌間
嶙峋旣相習翫弄若等閒
乃始就卑望俾得伸其全
一步一回仰一降生一妍
我如坐鬚房餐以蓮花天
了了見倒影谷底相交眠
我下高更升影處翳澗然

逍遙溪碧潭

尋溪思如渴溪古失其徑
水石參差間受趾卽吾磴
香色動寒秀靈幻竒難定
必往無遁溪奇果若來覲
潭光不一一有絲如珠孕
日陰時去來變與之呼應
攝身在

水碧光動魄亦徇復如作綠觀虛空同一印久之肌粟
生涼非遠風進逍遙何可窮遊爲他年贍

文殊院曉起石上見

雲一一態峰色色峰不及憑惟雲藏巖空誰嚼兜羅痕
寶函張翕光回惑目根逼口口逼語欲語旋非目所舉
縱知幻變告其端靈氣於焉鼓機杼攢峰南畔猶未然
僧言此是桃花巔

大悲頂見月華歌之

六月十五夜

千峰過雨懷秋晴一峰抱月壑底明欲眠不眠戀涼色

登岡望月當峰晴峰高雲下作雲海下屬紛然動光彩
不知空月忽重輪輪欲動空空欲攷一一輪端一色具
色一一光光四雨光盪爲輪不自安輪影垂垂月如吐
心奇目眩不敢呼老僧拜石聲鳴鳴明朝舉說前峰去
皆言夜雨眠何處

按日月重輪雖載樂府皆非古徵文獻通考天寶三
載正月庚戌日暈五重占曰是謂氣光天下有兵又
引容齋隨筆紹興三十二年五月十六日五更過
臨淮縣月外有環暈五重附近者紫紅色白者次之
青者又次之黃者又次之最外淡紅各相去一丈分
寸不差或謂其圓如規馬上諦視起數道行天文官判
大聲馳至俯附耳曰是爲月重輪前屯所紀多不遇
兩三重今五數但太陰極盛恐非太陽之利耳將曉

乃沒未一月而高宗異位觀此二事豈甲申之變久
默定與世人多以爲瑞應馬氏象緯考載之日變月
變中嗚呼其亦以不臧示戒耶傳爲祥者妄矣

望天都峰

不待知名異尊雄儼望中一根唯直上群帝此相通龍
氣命今古雷威秘始終難思烟霧裏其頂竟何窮

光明頂

升堂始覺衆觀平盡此虛空眼際明無復萬峰爭未下
渾然一氣錯相生江痕九子來窺厓瀑想匡家揖弟兄
鯢脊遂能分大海只疑飛路已曾城

甘露松

雨點涓涓滴四時分明峰頂露香滋山靈欲灑遊人渴
故倩青松作柳枝

白猿

見於始信峰底相傳一玄一白玄者額過於
肩常取食山園白者一無所染

如拳曾守藥爐紅乞得軒皇一粒功抖擻雪衣皆歲月
笑人毛骨電光中

九龍潭

欲下青峰趾不前斷崖立杖更依然直看九派飛流下
消入蒼茫破作烟

宿靈會庵獨有樓

平生突兀與樓親樓外千峯樓上人會得靈來頭應點
直從頑石悟前身

許元溥

遊黃山總述

聞說鍊丹處峰峰多靈藥有懷二十年千里涉厓畧良
友不我偕孤躡居士躡峻晨蔬食畢褰裳學行脚層磴
印欹窄藤蘿手捫摸頭陀作導師涉險跳且躍蜂蝶戲
繡帷鐘磬雲中作鍊魔選佛場莊嚴遍纓絡木蓮含異

香同參開瑞蕤大藏盛威儀淡堂無呼諾四面禮如來
相好七層各澗曲布龍鬚耳泉瓢一勺半壁破雨飛百
仞垂珠箔怪柏綉苔膚枯筇恒被縛石蘭自鮮鮮海桐
何灼灼淡淡杜鵑紅清麗送綽約奇卉難認名谿谿任
開落摘來挂杖頭滿身映花幕猓獮半面松樵踞獸爭
攬環巒千萬勢林立犬牙錯或如背相抵或如手相搥
或如頂相向或如口相嚼偃者伏虬龍隨者飛雖攫蟠
者索珠貫拔者利劍斫累卵未爲危植圭豈云削斷處
架飛梁鳥道踰劍閣木梯以當棧石懸蛇啗索洞天另

開闢舉然不以廊高高忽下下乍前又乍卻返視舊經
途攀鵲皆屈夔旋踵了無睹回互但蒼蒨六丁擘崩崖
殘灰成頽堊頽沙不容武膽悸步愈躑香谷最高峰紫
霞繞虛霏橫側寫貌殊粉本詎丹牕白猿獨修道採果
坐林薄倚有大士巖披衣俯幽壑右手持拂枝四序青
相若黃海氣淡寒盛暑涼漠漠樵牧絕幽影遊客鮮栖
泊野衲偶往還珍禽吟寂寞百步一平簾小憩藉飄簾
晨夕分烟嵐陰晴總堪托湯池可點茗丹井無盈涸聖
燈朗若星雪乳恣斟酌浮丘五色雲樓臺尙如昨釀酒

聽彈琴石人自酬酢眺月青牛溪松聲卽韶濩石牀列
龜形棋子誰疏鑿僊跡豈勝搜冥心契廣莫慚愧塵土
容御風肆磅礴譬彼盲遇醫快哉金割膜禪房深更深
茶烟起遼鶴幡動悟前生疑識驪山學高揖客成子永
矢行窩樂

張溥

送許孟宏入黃山

非我不能往青雲缺送迎躊躇出城意鄭重記山名飛
鳥心偏疾看花君獨清誰人歌此別前路恐寒盟

黃山志定本 卷七

賦詩

三

釋道衡

黃山紀遊一百四十韻

有閒無以遣聊展浪遊足勝情既不淺勝具亦久蓄甲
戌五月初乃以遊裝束一訪黃山雲井問故人竹行行
越林嶺夏氣一何溽丹樞照眼明蔓草連岡綠錢塘渡
頭來登舟遂舍陸江光冒微風翳然想濠濮揚舲未半
程忽與風波觸小舟蕩如梗浪白高於屋同舟少人色
勸我竺經讀死生當有定敢將聖賢讀枕席豈不安朝
夕死相續枕席與清流何厚亦何薄嘆息聲未已風斂

開晴旭迴視倉皇者安流皆穆穆始無向者危安知此
之福從茲江漸小來抵富春宿舍彼泮泮區乃與溪山
逐嚴陵灘頭雲莫將塵眼矚一入新安界清流尤可掬
戀此江上山但恨舟行速舟子解人意何必依灘麓蓬
窓水勢盛無日不懸瀑山禽船尾鳴溪鳥船頭浴擲果
枝上猿飲泉巖下鹿遲遲水程盡忽爾獲所欲宛在藍
水湄見我人如玉問我方來懽聲動奴僕壯者爲解
裝少者奉湯浴殷勤相勞苦高堂話明燭少畱欲別去
意在黃山隩伊人再三阻群盜方肆酷何爲犯艱險千

里就荼毒况此炎蒸時岡阜富虺蜮何如待秋清遊履
再爲卜感茲長者言老脚漸爲綰置我有道鄉聚族何
敦睦所耻以財雄所貴以義牧其中有英俊縱談掀地
軸欽此窮經翁發光蘊諸積更有闢奇者墨品今古獨
周旋有數君斯遊已不辱忽聞庭桂香遊興不待夙杖
子久閒住起廢應食祿苾鞋理舊繩青笠裁新榘孤征
凌晨發初暘曜林谷遙見大都山隱隱雲端矗山農秋
事成在在事鎌斫我饑前乞食施以香杭粥適別更前
邁忽來豐溪澳溪南有故交聊爾通名牘諸子一一在

相欬情最熟宿我荷花溪飲以香千斛相與買竹與臨
別再三囑非爲兒女仁各以道相勗是日最苦辛陰晴
變頃倏纔爲寒雨侵又展秋陽暴登陟旣云再厲揭亦
已數雖曰百里近千里同往復明晨次湯口雨勢猶霪
霖衣無如掌乾自視頗踴躍湯泉浴湯泉一洗塵勞目
假榻祥符院雖隘忘蹉跎祥符院中人作事何卓犖憑
茲一杯酒賣卻峰六六黃山峰故多此戲無乃虐於茲
坐未久忽得意意外樂欣逢幽導師此中老丘壑長齋有
髮僧泉石稱先覺我今以遊事再拜用相託花溪出何

源龍潭隔何域何峰險且迂何道坦而速遊山有經濟
事事共商權盤桓既有日情誼亦頗渥別之歸祥符一
雨淹九昨群峰隱不見坐霧令神涸悵鬱正難堪天宇
忽開廓再整山行具如病得良藥歷澗渡香溪前林恣
跳躍廿里入天門光異峰嶄卓蓮花與天都各以勝相
角實爲造化成翻似有瑠瑤萬仞無寸土石險恒疑落
三山吾不知似可傾五嶽嶽崎紫珪峙峭峭青芙蓉仰
觀插冥冥對之恒驚愕何來舒異光翠靄相參錯雲與
萬里濤松覆千人幄蓮峰一青蓋含吐附於萼九華亦

培塿兩目貌如粟迴觀錢塘江衣帶豈溝瀆乃知昔人
贊種種皆糟粕於焉恰中秋憑空玩皎魄金波薄兩背
令人廢圖度兩月在一天晦明曷由各曉起觀日出銀
雲湧金雀輕光動復疑微風向雲掠左爲文殊院有徑
天開鑿其潤不盈尺風霜萬古潤名曰小心坡亦以驚
行躋竇轉別一天紫芝芬可嚼山險步難留惟茲足盤
礴近有蓮花庵石如丁如髑留茲乃信宿往踐丹臺約
環臺翼群峰林立猶劍鐔排雲更刺空拔地亦無着前
海此三處其勝相倚拊從茲度後海幽詭億萬族海門

望千峰森戟不敢搏下視青冥冥雲是妖所索中多火
髮魁復有獨脚駢戲以石投之腥霧起如穀怪風忽射
人晴嵐雨冰雹自分多坦夷山鬼空娑娑舍之登始信
無端轉驚矍一峰儼說法群岫若承諾下尋散花塢有
松勢搏攫石筍峰亦近峻嶒宛龍籀兜率若蘊奇涉澗
香芬馥抵寺日已暮主人何愿慙總總山中人一皆
禪伯苟非心所安寧甘此淡泊溪毛度終歲蓋頭悉青
簪饑寒苦百端眉宇有餘活窮覽既以遍頓長住山學
火種須護生刀耕宜細斫玉砂可蒔茗黝土應栽服此

法忽妄傳山靈忌鉏耰因思世間事往往皆桎梏人苦
眼界卑懷鼠以爲戾行矣歸去來取途經白嶽有客雅
好交詩句聊酬酢清比泉脉淳險關山骨斷憶昔發錢
塘瞬息五易朔從頭一迴想何異孤飛鶴勇險俱已嘗
唯不到城郭來時荷田田歸時楓灼灼載別丹山友順
流返湖曲去去不敢遲空負籬下菊

朱 苞

麻皮潭

尋幽無所限隨喜領其情已見碧潭淨蒼茫映空明明

者受嶠口如星散繁英渺然根有無沈冥薄太清兩岸
亦在中條蒼隱縱橫神淵乃如斯物慮何營營

早烟度小一線天至大悲頂

懷幽想前期歷亂忘逡巡轉谷一天小淡微見鬼神烟
舍在高樹崖落曉泉新意會物翁冥隱然空山情峯峯
未全出猿鳥何時鳴乃聞谷音至始悟僕夫聲迷離失
所顧響答滿長林引起海中月歸野爲遠心

登蓮花峯絕頂

茲遊非造次盡出半生心空谷領浩氣高峯聞至音笑

喧仍不敢對恐觸層霄

得從日月遊倚天俯蒼茫海氣浮千鬱
綵光奔百祥所求良在茲恐懼莫能忘

蓮花三十六空相發中池人鬼百努力
天龍四啓知我來合掌冥理若能窺

萬松詩

萬松排寒烟幽異渺難測千年育其光
空翠助其色生無草木心及冬見高德
終焉發英靈偃仰神所式借爾爲奇材
足以康家國

凌世韶

慈光寺梅花咏懷兼憶家叔龍翰

凍花開落懶樵書老向慈光頂上居
開事大悲雲不住香聞離垢夢何如
青天皓月盟窮歲冷壑疎泉縱野癯
迸破寒山無漏智千峰處處見文殊

自是人畸出處同爲憐幽獨若爲通
才尊寶鼎彤雲上意在崆峒白雪中
郵使路疑音息斷廣平賦就蔓藤空
木花鐵幹元成偶雙笛高橫立曉風

劉同升

黃山

峭壁避一尺剛容老松臥看石還看松相看不忍過
安橋與設棧不復施人巧到此宜有梯天然放得好

吳鍾巒

宿文殊院

此宵莫作等閑看身已飄然雲霧端子夜披衣山籟寂
九天星斗正芒寒

行蓮花峰下

接奇始不負幽情仄石斜根作級行最美蒼松簪絕壁

無人得與老猿爭

鍊丹臺

帝子龍飛空有臺千年僊竈白雲堆秋淡醉葉紅於火
疑是丹砂遍地來

登始信峰望石筍矧

下有九龍潭

群峰齊挺碧琅玕拂日捎雲秀可餐始信黃山奇不盡
飛流直作九龍看

寄師子林詩僧靈聞

名山卓錫此禪栖抱膝長吟日已西鹿苑拈花微笑後

不離文字證菩提

參天插地恁神奇·收入毫端可一絲·若把天都都抹倒·
上人何處更題詩

咏黃山巨魚

咄哉何物老波臣·碧玉丹砂合作身·珍重山靈好呵護·
莫教烟火漫相親

凌駟

文殊院

有院結蒼巖·鳥道相招入·無風偏作寒·非雨亦能濕·獅

石爪若擎象石鼻欲吸兩峰虛而受一石中而立瑞筍
孤竹來珊瑚鬱林集許邁可學僊庾承堪絕粒高哉如
斯人邈焉寡所及

蒲團松

山靈到處奇樹亦無常理五葉自西來九年棄於此老
衲坐不穿劫風吹弗起時吼作濤聲而壁心如水平

白龍潭

水從遠山飛來移屈還曲勢若奔虬素波
水濤激裏四陸

怪爾老龍冬弗蟄無雲無雨奔來急素甲千片紛鱗鱗
頰角雙支雄解解有穴天開不見來無門萬尺不見入

空笑汗漫揮黃金利刀結轡山頭立
首山銅乳成太一弓額飛陞青天疾變作爪角觸雲烟
倒張喉舌吞星日純陽九九貯寒精陰崖六六漚長匹
走遍五扈與彈丸夜潯秋月同芻苢

破石松

琅玕露我奇山豁削峩含元混灝圻五丁開闢功城胎
天柱雲根稱獨壁有龍奮額撼虛空巖破大雷與積石
石爲母兮龍爲兒見墮天驚山鬼嚇攫日披月欲乘雲
旋根繞膝枝舒蓋慈兮石兮號貞珉侵曇香注芝成液

孝兮龍兮抑何神瞻仰帖屹聲聲咽古蚪明珠吐復吞
變幻雞栖起千尺恍爾司空理太阿寸光離匣陰雲割
須臾龍于滿山頭顧類歡呼舞狂霹

指月庵

太古山貌多屈折有雲無山山若失風衝雲破露奇峰
倏忽雲生已漫滅山上有火不知寒無僧下山不知熱
山下猶披六月衣山頭見過三番雪嗟我佛光不可得
尋得夢中堪自悅

前海

丹頭藥氣噓碧落鍊就欽寄櫟廣漠走到淡山如有聲
高人咳噓蓮枝幕翠微澹澹復凝凝澹澹者瘦矧者妍
天吳移山作海勢群島竦峙松風前杖藜到處驚龍蛇
抽我愁心翦亂髮問天天閉若不聞狹狹噉吐還相噉
曲水透激九折虜怪峰勞笑如人狂欲乘雲車來帝鄉
望彼高人兮攜手同行

後海

望後海後海不可望雲裏有山人不知只見黃峩舞狂
浪有時雲過一峰開恍如明鏡親眉慙杳然滅沒若復

大明鏡忽爾生塵埃有雲倏忽將山鎖有山處處雲中
生我身想亦在雲中那得見山如見我山兮雲兮兩相
宜有山無雲山不奇塵塵陸吾不可掃獅子爲鼠龍爲
龜海水群飛冬欲夏若木不華晝欲夜貪懷罔盡失所
思如寒失襦饑失糜

普門和尚塔

拈華悟不二四十九年中鶴勒還存性鳩摩弗任功金
襴猶色相珠袖等虛空得解無常法信終佛未終
死生同坐臥衣法護黃梅木石原曾火骷髏不是灰身

空明月夜鋒冷白雲隈永久因緣在何須說去來

丞相源

山中官閣盡丞相復誰名白草悲銀艾
瓊臺櫺玉薨鼎鐘鐃獸吻瓦礫解魚聲
沕沕蒼茫內琳瑯見赤城

蓮花峰

芙蓉闕靈界遙渺出天中穿躡失猿巧
翩軒絕鳥通路從蓮瓣轉竅比藕根空
半嶺出五嶽低峰越九壑雲梯銀漢近
木渡瑣岡雄獅猛堪搏石柏香徧逆風
孔淳憚幽峻康樂快鴻濛落鴈丹書祕
環轅頰穗豐是松皆誦

怪無石不玲瓏海氣水崖左江流匹練東巒頭識吳馬
龍背接茶弓山嶺阻高密星門陟有熊貪他呼吸在任
爾險危逢料混神僊跡誰嬾造化功應知震旦國只此
一奇峰

老人峰

有石飲得軒轅藥走向峰頭作老人懶性不蒙蘿薛謂
古風如晤葛懷民朝餐菌菰雲間露夕嚼桃核裏仁
是石是人都是幻莫教袍笏玷嶙峋

美人峰

髻是嵐兮縷是烟恰如飛燕號留僊望夫羞作胭脂虎
飲藥甘爲玉露蟬苔沒香塵單舄冷花霑薄袖舞衫鮮
雲來鎖卻延秋月不與人間學許渥

一線天

由文殊院復轉小心坡還過趙州庵右行五六里有
兩石相倚人行其中望天如線

人行小峽裏石破天開者恍惚疑中宵倒見銀河瀉
忽然一縷光長向雲中見此石不支幾誰知天孫線

湯泉

谷裏雲脂鼎裏霞衆香春息浸蘭芽丹成滅卻參爐火
煨向清溪煮白沙

紫石峰心裏太陽不施鑪竈自成湯朱砂飽殿難胎化
浴過湯泉骨自香

觀音巖

山僧指石說觀音松裏笙簧石上琴箏立不曾將耳聽
眼聞浩劫到而今

大悲有像立山旣有像無音達者觀我到天都不得上
孤高終是度人難

沈壽民

黃山秋夕喜崔鳳若見過

把酒今何夕方秋合到山世情湍水逝君意嶺雲閒訪
道羞丹藥酬詩許白鷗迴看松月好窓際影酡顏

江天一

朱砂庵

曲磴千盤盡何曾任鑿穿本來超色相不假幻因緣翠
滴松梢雨嵐開嶂外天此中饒靜解何事問栖禪

古剎猶金碧乾坤等劫灰息機原在悟彼岸本無媒轉

梵猿常下傳經鳥自來他年返初服結屋向丹臺

寒江子高風亮節貫日飛霜乙酉死後著述多散逸
不傳存此二詩其人其文與千峯爭高可也

江九臯

飲扶光書室望蓮花峰

黃山鬱嵯峨拔地起千尺髣髴玉井蓮風標畧相敵浮
溪士林彥結屋傷山色琴樽有妙理泉石饒勝跡余亦
磊落人班荆話時昔嘉樹映晴空殘陽被廣陌清言還
五斗浩歌仍一石望望蓮花峰瑤岑點秋碧

山中月夜聽猿

黃山三十有六峰峰峰削出青芙蓉白雲紅樹自重重
山中猿狖時相逢宵來海月飛天東綠烟消盡光幢幢
皎如歐冶磨秦劍意致縹緲驂蚪龍蕭然有聲來碧空
裊裊淒淒悲且雄引商刻羽含清宮哀絃急管非笙鏞
澗泉鳴咽風鳴松恍然坐我三峽中誰聽此聲涕沾胸
蘇門清嘯將無同天風海濤曲未終林端月落聞疎鐘

白龍潭

白日騎龍事有無當年芳躅半模糊祇餘終古激潭在
畱與人間記鼎湖

釋弘智

贈沈耕岳先生住黃山

天地爲林藪容君筆種田千秋誰脫劫山徑早亡年

聞有

白水美玉諸君遇從

世積餘杭篋新添栗里絃火鱸能寄語他日

問香烟

得施愚山書約來年遊黃山

年來三疊煮山茶笑得臨江送落花正借青原爲白社
又期黃海浴朱砂焦村路上乘朝霽石笥岡頭看晚霞
丘壑未忘開養老夕陽不畏亂雲遮

項士文

雙鴉

鳴鳴旋繞向經臺就食懷中遣不開自是黃山雙古德
新雛何敢入群來

張岑

山郵雨宿

巖谷誇奇絕茆庵尙作郵吐雲迷下界望海結神丘怪
石曾無語蒼林不易秋明朝登絕巘磨壁記晴遊

陳昭祥

黃山道中風雨呈同遊諸君

窈窕揆名嶽神飛珠樹林亂雲經石險溼翠入松濛風
急搖飛瀑嵐開見遠岑壯遊千載事莫負薜蘿心

同殷中秘子新遊黃山分賦得槎字

名山百代表中華一月從君弄紫霞架壑有松皆翡翠
逼霄無石不蓮花壇空尙想軒皇世天近疑攀漢使槎
欲向丹臺采僊藥碧桃春暖暮雲遮

宿翠微寺

請天縹緲出飛巒絕磴遙穿百二盤日月長標雙塔迥

烟霞淡閬萬松寒有時蒼苔間雲葉無數蓮花擁石壇
卻笑探奇心未已翠微還向夢中看

陳茂才仲仁實夫載酒晚酌飛瀑上

石溜平飛雪松風亂湧濤此時一杯酒興與石蓮高
長賭此何地翠微淡萬重酒闌人盡散明月一孤峰

楊 宛

詠黃山

黃山山上萬峰齊一片孤雲千樹低笑殺巫山峯十二
也稱神女楚王遺

無名氏

古詩六首

何年開混沌闢此元化工壁立于青霄群峰相角雄鍊
丹八甲子黃帝服升空竈曰依然在山花還自紅誰人

繼芳躅遺跡碧山中

鍊丹
峰

天都九百仞秀奪金芙蓉異香落泉谷長引白雲封人

傳僊會所鸞鶴何時逢跪問長生訣金丹駐玉容

天都
峰

軒轅得道去峰上紫芝開山人欲采無地可躋攀石

室有道士傳聞好容顏釀酒色如漆彈琴靜空山滿逕

松花落空悲樵子還一別出洞口雲淡水潺潺

軒轅峰

黑白含正奇周天數如一誰將基石峰突兀半空出數
着尙依然解圍更何日樵夫偶竊歸顧子仍舊蹟人間
話僊踪復來路迷失

基石峰

南國多松林茲峰獨神秀天風撼翠濤勁骨弄清瘦守
此歲寒姿敢謂冰雪厚豈不懷棟梁永養山中壽

松林峰

軒轅製石床高傍斗牛宿清夢迴峯巔俯仰覩化育僊
蹟自何年還供採樵目寥寥碧枕遺桑田幾反復

石床峰

五言今體二首

高峰三十六丹竈洞雲邊獨采山中藥閒聽石上泉青
牛芳草路白鹿紫芝田瀟灑風塵外南華第一篇

晚三
十六

一勺雲根水春風人醉鄉氣浮雲作雨盈貯暖還涼不
畏陰山雪猶然飄沼香遊人歌水調何必在濠梁

溫泉

五言絕句十二首

維摩去何處石鉢凌青天古洞無人到依稀燈尙然

鉢

山中有樓臺米鹽左右積云是浮丘居高峰插天碧

浮丘聞昔此溪巖有客傳清淨以成人上昇至今畱阮

姓上昇峰

霞衣映山嶽黃帝乘飛龍丹成去天上目斷望

僊峰望僊

萬仞立青鳳天工幻削成何年逢火玉月滿

洞簫聲青鸞

石柱凌青穹超然出霄壤秋來玉露多萬

仞僊人掌石柱

曉鐘有雲出晚鐘有雲來無心雲出入

日日洞門開雲門

峭石籠丹霞遙望峰如鏡誰知小華

山通此日華簫丹霞

到處環青嶂孤峰覆紫雲山川靈

異氣偶爾弄氤氲紫雲

長日惜青天與一簪子文殊

失控馭誤落空山裏簪子

峰頭一片雲山自藏雲洞四

海望甘霖莫入襄王夢雲原

僊客何年往峰雲日日生

山川人自老無處覓容成

容成
峯

兩朝

錢謙益

湯池

峩峩紫石峯迸泉瀉天半下有湯泉口噴沸然鑪炭陰
陽交劑和涼溫互輸灌暄暖便祇濯清冷宜醴醴立象
徵明夷流惡類奔竄蒸池匡楹涌溝壑徒瀉漫天爲湯
沐賜神用陰火煖不數硫黃礪肯比礬石渾天下湯泉
多作硫黃
氣惟鑿山是礬石惟昔軒轅帝在宥天下亂神丹內服
泉黃山乃朱砂泉
食靈泉外烹煎一浴肌理皺七日毛髓換龍來雲翕集

風吹霧消散，漿露玉壺凝。冠履珠面貫，至今石壁題隱

隱南山，斫我來值春晚。桃花湯，湔

桃花峰下有桃花溪，木名桃花，湯流

人湯

香風解煩醒，蒸氣湔微汗。晞嗽綠腸淨，拂拭紫絡

粲。原憲腫可差，皇甫痺應湔。陸渾火焚灼，焦原勢廉。爰
未能除人病，安用滌身瘡。誰把浮丘袖，永懷玉女舂。執
熱竟何云，晞髮起長歎。

慈光寺

普門頭陀行，光明動帝后。兩宮賜剝染，少府給組綬。脫
卻金紋衣，麻鞋露兩肘。毘盧金像設，梵筴琅函剖。煌煌

慈光額天子維獻壽金貂馳北照銀榜賁南斗寺踞天
都隴面勢抗龍首朱砂拱其左疊嶂撮而右飛閣千尋
涌諸天四圍負龍像震旦尊鐘魚六時吼幡幢內家織
齋鉢大官糗鋪張金世界變見錦陵阜嗚呼卅年來滄
桑逼陽九宮移長信屢卜應津鹿久玉衣寢宮重脂澤
鏡奩厚八極誠晏如三災所時有椒塗恩賜節榆塞金
錢走招提佐軍興衲衣裁短後我來禮慈光俛仰思文
母僧徒日魚雅禪誦午譚鈿空山猶昇平慈恩正講受
泉流石塔下桃紅碧溪口客拜漉水囊僧持埽花帚尚

祈白毫力庶復金輪舊頂禮九蓮座

宮中稱慈聖
爲九蓮菩薩涕洟

重稽首

天都峰

萬曆甲寅普門和尚始陟天都絕頂丙辰濶庵和尚
偕同衣九人再登累石爲塔揭二竿縣以旂燈從下
望之塔如人立騰從風迴翔厥後罕有繼跡者焉

天都九百仞竦出羣峰上我行陟慈光厓巖正北望繁
如冕旒垂突如甲冑壯僊都儼侍衛蓮花屹相向鍊丹
雖鼎足頻伏慙輩行削從大地拔高與青天抗浮雲不

龍齊飛鳥孰敢並古云天之中軒轅此遊放
峴巖負斧依幔亭列衛仗月白霞衣鮮風清
廣樂張憑虛命天老排空召雲將至今數千
祀真都隱沆碭普門始荒度潤庵繼策杖絕
徑引猿臂缺竇縛馬柳橫穿身入甕倒擲頭
觸甕百仞更顛頓方石足輪廣累峯象人立
樹幡危石當神燈不可見色界吾安得書開
三天部圖記互評量此爲天子都彼爲天子
郭盧率西南屏大郭西北嶂營如侯甸服離
衛帝都王香谷氣方馥桃花水初漲帝將
觴百神吾欲合群靈

蓮花峰

蓮花峰峯峒高與天都並峰趾仄下垂屈盤隱梯磴峰
如蓮正開趾如荷有柄綠莖附其瓣百折峰始竟側身
竇石腹刺促藕絲經罅漏忽穿穴藕孔隙光映上有半
間广凸如蓮子迸又有蓮花心數尺凹圓徑羣峰簇相
拱田田荷葉盛我來倚孤藤敢與颺風競支頤雲梯畔
足跂目轉睜自從出湯口諸峰互延亘天都尊無如蓮
峰變難凭初疑玉井頭如船藕相擎簇簇青蓮房萬葉
擁卻迎及憩文殊院西而看最靚妙花聳青壁石瓣承

其脰趺坐敷莊嚴明粧比端正西北灣未同菡萏一峯
稱南下桃花峯飛梁似連膽玉縈近可攀連理遙相命
數武俄改易一瞬已幽復側出橫秋波平鋪落明鏡顧
盼良已煩畫圖豈能評惟有青蓮眼嘗見勝蓮勝

石筍砭

黃帝上昇後靈山忽涌潰化成千尺峯乃是雙石筍詭
異竊堪與象滋靡域畛幻化石有靈包解筍無盡危砭
如防盛列石類欄楯銳如浮圖蓋鐵如劍戟展叶澗如
波濤散楚如篆籀繁或屬而絡繹連連復徐引或宮而

摩圍撐拄匪囚僭或如經天星未及尺而隕或如靈胡
掌裂裂地爲墳象物總雜糅搜搏互駁踏大地刻玲瓏
神匠碎齋粉琢鏤鬼畫驚奇譎天亦哂我來陟此岡悲
高數懸崖指顧眩景光心目困撫嶺西北山中折勢與
削成準沆碣倦都出青練翠微近廬江畫衣帶池陽堆
庾圉虛煙長靄靄人語或殷殷側足臨大荒傾耳扣虛
北片石投下空礧礧似雷貫中天腐骨輕下界夕陽隱
生年厄枯筭世事叢苞蘊安知石能言不以我爲箇

高誘

日蒲竹
筍也

鍊丹臺

我登鍊丹臺談蕩上青天旋觀六六峯一一排青蓮崇
臺據中央宛如蓮萼然千瓣復萬莖迥迥相鈞連玉屏
展青嶂香爐罨紫烟奇峯劍危石櫛列差潯肩橫若羅
劍盾矗若奮戈鋌猛若屯天獸疑角夾九閭伏若萬金
車縱鳴復收旋神靈旣役使頑礪俱騰騫相將守丁甲
誰敢窺未鉛日車陽焰燬月駕陰火然至今丹鼎中光
氣流朱殷在青軒轅帝垂裳理八埏命龍馭絕轡驅虎
定阪泉六相資輔弼五賊收狂癩藥得君臣配火用文

武煎海宇鑪鑄定陰陽藥物全然後事修煉黃服朝上
立服食八甲子登假千萬年有如世不治慕道求神僊
張樂洞庭野採藥照山巔何異周穆滿車轍馬跡焉軒
皇去我久刀圭世莫傳願發珠函秘進獻玉宸前

辛巳三月七日發瀟口徑楊干寺踰石碓嶺出芳

村抵祥符寺

照山陵嶒比華尊連岡屬嶺爲重門我從瀟口旋登頓
裴徊薜石過芳村山墮谷襲水見底灘聲半出烟嵐裏
千叢竹篠衣石壁一徑落花被流水茅屋人家類古初

橫枕溪流架樹居白足女郎齊催蕨平頭兒子半叉魚
路出嶺中山始放黃山軒豁見容狀一簇蓮花擁閭闔
千仞天都展屏障旋觀溪谷相迴紫浮溪如卻容溪迎
溪流環山山繞谷周遭匝匝如列城茲山延袤蘊靈異
千里坤輿盡扶持創寫萬壑流穢惡離立千山護空翠
天心地肺杳難推明日懸崖杖策時一重一掩吾肺腑
到此方知杜老詩

宿桃源庵作短歌題壁示藥谷主人余掄仲

天都諸峰屏障開白龍潭水綠浪迴浴罷湯池瞑投宿

流泉午夜如崩雷溪山至此非常調主人卜築領其要
刻疏雲氣排窓櫺穿穴烟嵐置堂與山中辛夷花放榮
世上桃李俱落英卻笑僊源迷子驥還緣藥谷訪容成
老僧三年不出戶蓋頭莫爲誅茅誤雨後黃山更奇絕
看我青鞵去時路

桃源庵小樓坐雨看天都峯瀑布作

崇朝澎湃雨不止小樓翳蒼雲霧裏千流競寫白龍潭
四窓橫挂天都水水飛石擊相鉢碎龍蛇攫拏山谷鳴
軒楹坱圠天欲滿隱几屏息心忤忤薄暮解鞍日車露

次第呼童戒杖屨始知急雨非無故天欲老夫看瀑布

天都瀑布歌

天都諸峰遙相從連綿嶧屬無罅縫山腰白雲出衣帶
雲生疊疊山重重峰內有峰類皴染須臾蒼合仍泥同
曾雲聚族雨決溜溪山天水齊冥濛是時水勢猶未雄
江河欲決翻盆壅良久雨足水積厚瀑布創寫天都峰
初疑渴龍甫噴薄抉石投奔聲礧礧復疑水激龍拘怒
掉尾下拔百丈洪更疑羣龍互轉鬪移山排谷轟圓穹
人言水借風力橫那知水急翻生風激雷狂電何處起

發作亦在風水中波浪喧
厓草木亞搜攪軒簸心忡忡
潭中老龍又驚寤綠浪瀆
涌軒窓東山根颯拉地軸震
旋恐黃海浮虛空亭午雨止
雲戎戎千條白練回冲融
憑闌心坎舒撞春坐聽濤瀨
看奔衝愕眙莫訝詩思窮
老夫三日猶耳聾

發朱砂庵逕觀音巖登老人峯

黃山之麓山匝匝雙擎拱
峙三三三三三三三三三
三三三三三三三三三三
三三三三三三三三三三
攀躋惟恐兩崖合壽藤古大
道纒繞一徑陰沈少見天
脚底溟濛踏雲氣頂上噴瀝
過飛泉霞城乳竇亘山足

陽壑陰巖互攢簇朱砂洞室趾天都采藥僊源接香谷
振衣直向老人峰曾雲壘涌鋪虛空初似炊烟浮樹杪
卻看膚寸起封中綿綿飛絮卻復迎團團車蓋遙相竝
白衣蒼狗半有無樓閣華髮遞穿迸蕩胸觸石彌網繚
車馬決驟旌旗勢如濤如浪復如海至竟但可名爲雲
須臾雲歸如鳥集晞髮青松身溼溼回頭卻望老人峰
僊僊仍向天都立

緣天都峯趾度斷凡橋下木梯憩文殊院

天都趾右石屏南墮山嶧嶺嶢且巉峭壁崩厓罅欲裂

異松穴石攢如簪嶽峯數里俄半攀峯峇百丈咸中弁
峯巒移步貌改易蒼翠着面人熏耐崎嶇鳥道陟又下
摧頽繭足縮復探盤回下梯身入井甍呼命侶聲出甌
僧徒扶曳咸右袒與人負荷長左擔俯躬正恐肱三折
側足祇容劍一絨挽葛千尋出洞穴誅茅一畝憩小庵
天都東拱勢翼翼勝蓮後負形沈沈上擁趺石宮宅穩
下臨莽蒼光景涵靈山削成隱佛土普門應見開精藍
清曉梵貝響林樾午夜佛火明烟嵐香象拒門表奮迅
神鴉乞食離嗔貪隨喜幸到文殊座投瞑還同彌勒龕

軍持漉囊在何許桑下一宿吾所慙

宿文殊院夜起看月

三十六峯月魄裏老僧夜喚神鴉起空山午夜光景微
濛濛薄霧霑人衣

從文殊院過喝石居到一線天下百步雲梯逕通

花峯憩天海

昔與炤上人共訂黃山約執手文殊院披雲一長嘯蓮
花溝畔少人跡蛾度蛇行限削壁炤公前轍勾公推如
上天門生四翼積沙披歷見幽居白石錯落爲周陞背

屋屨屨疊雲浪下方軒豁呈日車亭午齋鐘赴天海接
翅神鴉已先在盤回折下百步梯行人項領與踵齊九
步喘汗十步息度樾穿林又枳棘青柯坪前絕韓愈蒼
耳林中失李白須臾復出海子巔意行懸度雨茫然誰
知絕頂千尋地只倚孤懸一線天蓮峰未上日已晚放
杖松窓聊自忖莫愁山中石路滑終羨老僧脚頭穩

登始信峰迴望石筍石

三十六峯拔地涌此峯豉之纔及踵臨深爲高地使然
附巖勢能數高冢松枝懸度勢微氣畧得孤鶩風從從

石徑曾無飛鳥度茆庵尚有殘雪墜
上視近天心氣肅下臨無地魂魄悚
平鋪萬狀盡雲練幻出千嵐似丘壘
邐迤迴望石筍砑萬峰巒巒攢穹若
故知造化善戲劇遂使鬼物齊開張
破碎虛空作危囿博覽厚土成圭璋
孤撐扶陷互相詭妥伏整闔不可譖
益州二筍何微眇天平萬笏空迴翔
起視大壑隄尋丈卻立萬仞憑堵牆
高陵巨谷堆衆皴都邑嶺陰分臺芒
蒙雲一點出九子突烟片縷回池陽
心駭神移耳目怠積蘇累塊今安在
中天惝恍遊化人步地蒼茫竊豎亥
錐鑿將無死渾沌

刻畫何當罪真宰經營團辭記靈異忽漫執筆成晦昧
眼看夕陽信奇絕安知夜半不遷改笑殺區區刻劍人
但認一漚作黃海

登鍊丹臺宿天海

是日日御薄下春萬里一碧澄秋容鍊丹臺陽訪丹室
斗絕下瞰馮夷宮靈區占據宜神物陰雨穿穴多蛟龍
何當劫灰養伏火豈有石室支剛風頻窺悼慄據極檻
卻倚眩運憑虛空丹峰香爐屹相向翠微飛來翼以從
三十六峰離又屬化質幻出千芙蓉俛仰堪興恣枕藉

浩蕩茫天地易星河錯落九天近日月回周兩九
進高山矗立羣巖封巨浸微茫一牛跡憶昔軒轅鑄丹鼎
相度茲臺作宮宅抽添火候資陽烏採煉陰符用月魄
役使百靈守爐竈錯列千峰儼陛戟一襲珠函至今在
千年鬼物誰敢搯天風蕭騷日已夕攬衣欲下心不憚
文楸萬木聲槭槭素女清絃響金石南斗闌千星可摘
安得商飈發兩腋望僊峯頂看月白

由天都峯趾逕蓮華峯而下飯慈光寺抵湯口

天都劣則不可上絕腰束胸將安往蓮花峯下徑仄垂

剛風蓬蓬吹勒回磴道千盤互攀援足巡回途目欲旋
兩腋風生似掖扶絕壁雲遮失泯眩靈山惜別如乍逢
凝嵐積靄開重重丹崖卻轉圍紺殿翠微深處聞齋鐘
未央長信已遷改慈光香火千年在碧桃花開遠石塔
砂溪水流環法海經丘歷广重躊躇卻望青峰卽畫圖
襍摺雲衣看壘嶂微茫雪逕認天都六六蓮峰倚林樾
歎息青蓮久蕪沒曾聽當時吳會吟惟有黃山碧溪月
發桃花庵山澗口逕芳村煮瀉口

老夫入山雨洗空山容水色相鮮新老夫下山雨祖道

雨氣溟濛山更好春山皎潔如秋清先庚後甲雨卻迎
已放飛流懸瀑布更鋪雲海媚新晴人言此行天所予
宜晴卽晴雨卽雨海市何當用禱祈石廬還應薦酒酤
三十六峯憎我回屯雲罨霧畫不開桃花溪水尤惜別
鳴車濺轍爭沈澗山中桃花紅未了人間春去知多少
試聽同聲山樂禽何如交響頻迦鳥

桃源庵夜雨

淙淙活活夜分鳴知是溪聲是雨聲明日穿山憑雨屐

卻過雲外

峯名

看泉生

雨不止題壁

憑仗巖尖與杖頭浮生腐骨總悠悠
天公儘放狂風雨不到天都死不休

方拱乾

黃山道中

躑躅病滯佳遊時負黃山誚如期
千里友未面心先到復如購異書
隔雨摩其與一雨滌輕裝初月倩
爲導孤勇絕劬撓擇侶縱所好危言
童僕驚姑筇僧獨肖卑村亦在峰荒
宿迷殘燒涼曉高乃生不從風力造
靜掩結幽

緒將覲情翻躁猶懷盛名疑未向山靈道

宿朱砂庵

人生向山心卽近亦能遠矧此江漢遙遐踪相宛轉百
艱藁一來則齊夷險但矚光熾然難從聲影遣宗廟
百官觀不藏安得顯示人本自千萬態紛相掩月生非
異規心目倏成變欲擬神先搖憑夢爲淺淺

望天都峯

觸卽得其色復非色所居烟雲不敢受矚者光之餘夕
陽澹無言一峯元氣初

入文殊院

萬無一磴理忽與諸天通松石亂無賊齒芥憑鴻濛寧
惟意外奇古今聞見竊攝身入江海呼吸隨雨風尚嫌
鐘磬煩聲出無聲中

曉偕無補石上見

峰反是貌雲是質偶然遇之呼則失欺人不見忽示奇
惟恐其知瞥一窺盡世間色種種備一人一時見亦異
隨所擬焉若相當纔持語人旋已忘不日不雨不風烟
此身如翼漸翛然欲記欲詩難高下楊子誓言廢其畫

月生華歌

登蓮花絕頂千山晴徹無纖翳下登霏霏作雨意至
大悲頂淋漓不得行遂閉戶臥更餘忽霽漫一登側
峰探之猶意未得月也纔登月在雲裏下方漫漫作
雲海觀者爭言雲奇偶回瞻月生重輪紫綠光聚如
錦轂如繡盤如若木花隨月得色斂而舒者三同觀
廿餘人皆曰得未曾有妄言山靈好我不偶然也歌
之以志月遊

臥雨不知山月生啓門忽疑前峰晴峰高磴曲月難入

別上一峰看夜色月規初滿峰氛氲下視矚矚惟層雲
羣情爭向雲生態獨一回睂月光怪百千億色聚一輪
一輪一光清晶晶從輪覓光光不一強以名之得其七
恍如七月範一月光滿七者爲一攝目神入光亂無主
人間賁素賤如雨青天欲動光自在懸久月如迸天外
卷舒一息薄霧流曉未及收恍夢遊屏氣長拜不敢呼
低聲但道平生無山僧漫自神其說佛光平常等於月
有客搖頭曰不偶我曰黃山夜夜有

日生華歌

日未聞以華名華如月遂名焉碧宇高淨霧薄如籠
重輪四罩作萬種光日中影絲髮堪數已而雲成金
色橫織日端日紋成十數重金雲縷縷至暮雷不散
信日爲黃山奇也山僧曰住此二十餘年未見焉

霧中忽驚月出蚤僧厨午烟青未了凝晴纔知是白日
毋霧歸光光直射團團爲芒復爲蓋下垂都作嬰珞態
示人可親如月出光殊於月炎而熾千峰一時齊失容
盡大地界成一紅咸池濯濯神新浴翔鳥疊翼紛堪掬
情知凡采不敢逼別領餘輝作雲色微青一點疑峰影

黃山志定本 卷七

月言

書

執影授峰峰不肯雲奇織光清於水以日爲經雲爲緯
元魄橫溢經緯外一峰一日一色在久識黃山日月奇
詩書記載皆無之石上相對神塔然詢人非佛亦非僊
山僧奢願到月華問我昨夜何所加

擾龍松歌

黃山松以名奇者七不名奇者千百獨此松居始信
峰下孤生一峰根露峰膚株藏峰腹左枝橫生如垂
練如曳尾覺都門報國階下猶是無鹽矣彼東家子
安敢不推月光上座

峯未根時松已根指身爲根峯吐吞身奇不肯輕示人
時一露之賴峯痕到頂將伸意還屈千齡難結一枝絲
欽寄故欲學峯形峯高松短同奇局忽生一臂橫十丈
不及顧根遙相望一曲一結枝成根垂垂恍與峯揖讓
平觀絕巘一青蓋登峯戴松峯斯在翠髮如茵拂不長
雨露安敢增其態拏雲搜海夫何情無能形之強以名
羣峯亦知戀松立驅奇齊擁爲松城黃山是松奇難擬
曾衆松奇失松體眼中所見森森然及此真成鱗爪矣

下山示同遊

遊歇翻如夢醒時理遊如夢轉多疑忽經意處遂成絕
曾有人行猶未奇於爾尙難同記憶從今直欲廢聞知
孤懷都結黃山相明月高峰或在茲

十日遊堪了半生第從癖性托溪盟神惟旣醉還如默
奇莫能名轉覺平妄一摹來疑信眼難爲此後水山情
迷癡不記中庭坐前夜蒼茫何處行

自朱砂庵至文殊院

老松不枝葉茸茸髮如翦只受雪霜恩忘卻所生遠
白雲與峰約峰起雲自坐高鳥力不如爭飛飛還墮

仍無根株雙松表孤石松當在石先天疑等人力
的的下方晴簷雨滴無次只此對面峯晴雨時各異

自文殊院至別峯庵

松不許石完托蒂穿其腹腹穿頂仍堅直直一蓋綠
羣木暄無營一松雨獨滴怪來山下泉聲都成松液
駕言超高舉遙迤爭入洞洞窟聲亦絕一仗羣山動
孤瓢不成屋獨僧抱石處問我濕衣處下方幾時雨
步步援引絕置身忘高危雲中見月夜宿處卑
未敢一稱奇但覺所經勝當其未盡處誰我我不信

常言夢想幻時作未必然及此耳目亂始令夢無權

自別峰庵至石筍庵

孤峰峻如綫危渡千巖水下炤一眼泉直上四十里
仰視受峰欺躡身凌其上不敢道石奇但曰雲難狀
雲封石作筍倩風以爲鑰欲洩意猶艱時開還復闔
老猿白如石詭言年千百住山肯如猿人間無歲月

自石筍砭至皮蓬

羣峰湧如粟矗出收不迭那顧峰下人一目無多曉
峯頂人如雲呼之應始信昨日我登時羣峯爲呼應

仁面削明光懸示字堪識巨靈亦文人傳教到臣頤
朝夕此諸峯回頭如新識峯解戀遊人示以別特色

李 雯

湯池

神芝祕丹經騫帳駐馳策繕性豈中期餌服資外益少
小誦靈文丹砂洵良石勾漏旣荒州地腑藏已僻矧茲
山川英寶蓄奮奇液溫源濬芳甘沸泉又清湜效著橋
山池灼異沮陽翻瀼瀼桃花湯璨璨瓊砂粒豈惟玉女
盤不假金膏澤黽勉滌微躬晞髮當朝日

桃花源望白龍潭

皎日滌新秋層崖麗朝閣有客披雲姿探奇自此作巖
中訪石英戶外摘芳藿眷然啓山扉主情會溪漠登此
谷中樓兼茲山下壑懸流亦素澄頽石何磊落邂逅羅
槿葵清懷澹然諾俯仰几席淡左右塵鞅薄雷雨藏尺
波神物資戲謔坐此會忘年何必期採藥

慈光寺

靈嶠旣崇嚴禪林有深會昔門真浮屠神宗盛皇帝荒
林啓梅檀香象度層甍望前六蓮花何異多羅樹真如

金聖鑑袈裟光爛碎天母手親裁寶冊馳中貴二聖千
萬年百靈奏祥瑞豈日求空無聖孝震天地鼎湖不可
攀天下日多事大師亦西歸曠恩久塵棄至今金蓮臺
覆在茅茨內大乘與化俱隨時見隆替庶幾玉階平至
尊念遺墜永願或可從鬢雲會清閨

自小心坡至文殊院

晨光照西峰遊子心潏潏微徑聊可從寒磑距股掌清
濕新漏泉屈射雲竇睨神谷旣屢斷形壻更淡往霄岸
匪苟升松門不虛敞靈竒有駢會合谷見英爽蕭蕭北

風初冉冉南雲上顧此一念徒伊蒲非外獎

文殊院雨後早眺

文殊面陽崖重椒肆秀望日出天都東散在蓮花上松
栝洗晴嵐長風激雲浪石林氣清淥天人共淒曠淡瀨
光翠搖潛瀨壑聲壯俯視升氛勞始知奔峭橫山蒼秋
易高曉靜跡難放七月遂寒衣憑虛一惆悵

登蓮花峯

拾策上窮巘褰裳歷洞室顧足謂已高瞻景猶未畢離
披發初苞空嵌鏤秀實薄霄念身浮空覺知勢積西望

匡廬溪北擬太華敵神州
蕩崢嶸飛烟肆遙慕峰上日
方炫巖下雨已浙靈域韜澄鮮真氣潤松柏跡曠省慮
馳形危爽近適涼風濕我衣歎然下層壁

始信峯下望散花鳴

林陬靄曙光雲日宕晴媚散花旣青宜始信亦奇銳傾
崖徇蒼陰倒影不及地飛泉響外音仄峽緬幽隱已觀
朱明移復與互景會天矯潛剗安穹窿丹磴勢抱志無
與宣悵然秋風際

文殊院阻雨

日月空山暗風雲早晚看石門秋樹肅板屋夜鐘寒鳥
雀飛全斷蛟龍出不難未辭幽興極濕我鹿皮冠
羣壑諸峰下湯湯萬丈流白雲侵夜湧昏嶂入天秋
蘇味苦仍食松心翠欲浮尚思鸞鶴駕風雨碧山頭

湯寺逢立秋

秀壁高林迴夜光鐘聲散入五雲長僊人有使皆騎鶴
帝苑無泉不浣香採藥未能搜土肪尋師空自想羲皇
何當一夜秋風發爲爾先教客夢涼

釋音可

一線天

雲裏石頭開錦縫從來不計嵌斜陽何人仰見通霄路
一尺青天萬尺長

鍊丹臺

白萬雄峰爭火焰中央湧出玉樓臺石頭鍊得平如掌
晝夜烟霞掃不開

楊臣諤

讀谷語大師黃山歌作

劉覺岸先生歸自黃山以其賦投谷公公谷公喜而作

歌子輒併取讀之以當臥遊因復作此

孫綽賦天台杖屨何曾到繪者圖其形作者領其要圖
僅得其膚賦且臻其妙鏗鏘金石聲山情爲寫照黃海
天地間已鑿元化竅在在富奇情古皇因證道作賦有
劉公親詣窮堂與寫照殊更加神情兩逼肖吾師屐未
着觸賦心神造琳瑯千百言寄題憶所好何必遜永嘉
均非徒觀貌浮丘與容成招攜在山崎巍我徒羈棲不
克鼓遊權師拍浮丘肩我覓容成竈三十六峰頭放歌
成四笑

王玄度

文殊院

積雪濯山容晨侵陟寒磴溪迴見千盤巖洞懸空暝俯
首壑前雲側足身外徑香龕闕幽巒真界存孤乘異構
匪思維結念冥相應無始具勝因靜密聆清磬松風正
蕭颯飛光自延旦澄省杳無餘肅然止觀聽

黃山溪同汪亦止賦

溪山抱叢石混沌未經收水尚遠大川激盪不成流初
行坼古崖丹香噴奇幽循次赴危壑下走如懸旒入溪

逐溪舞動與磊砢仇踰梁墮大池奔瀉銀濤浮巨門峙
高闕鱗族成煩愁澄湛映心骨空澹陰颼颼碧渚闕淡
峭平臺列層樓已墜復中駐逼鑠驚回漚巖洞遠可探
瀑布飛上頭閃入誠難測震蕩無時休神哉造化功僊
源良不侔

白龍潭

白龍潭止水高時舞空明有地千尋漏無塵萬斛清冥
濛濛處雨溟溟夜來聲神物呼應得蒼劑或可耕

周勒卣來黃山賦贈

黃海春雲接漢關
遲君遊屐到崔嵬
荒藤石冷僊人宅
靜月峯高帝子臺
萬頃蒼茫吳麥綠
千崖激楚蜀猿哀
尋真老壑他年事
六合風塵尚未摧

蓮華庵同程扶漢

攀蘿得徑入松杉
幽隱禪樓傍舊巖
一壑三峰雲霧靄
三峯平列石巉巖
風搖密竹依清磬
水東飛泉向古函
世事浮塵催不住
蓮華何處染征衫

羅漢級望鉢盂峯

毒龍藏石鉢飛擲翠微裏
呼之時下來風雨千山起

次韻送俞去文人黃山

百盤高處鍊丹家，剩有蒼蒼石上霞。
君去不須分石罅，青蓮洞口碧桃花。

譚允謙

黃山

隔瀑投崖詣別岑，千山風雨鼎湖深。
客路時穿過石心，松下甲遺誰爲拾。
淵中琴奏孰知音，軒皇一去無消息。
腸斷孤臣何處尋。

天都謾謾長諸峯，開盡青蓮幾一重。
三嶽借雲滋草木。

九華分乳孕芙蓉浮丘樹粟偏宜石軒帝爲園止種松
遠地只隨君自至豈無人往告義農

蒼嶺寒雲落古筠山中何處見先民松高巔頂禿於我
猿老鬚眉白似人嚴樹倒懸蛇下飲僧茹孤敞虎爲鄰
如予未及從雲臥遠白軒皇稱外臣

湯燕生

宿文殊院

瓊樓面面聞風齊絳節千年護紫泥雞逐浮丘峯頂鶴
龍驂軒后日邊霓晴雲雜雨銜僊掌絕澗憑松渡玉梯

夜聽風簷驚夢裏移情如傷海天棲

晴秋列嶽翠龍從目盡高溪展齒通隱士雲生千嶺上
僊家天在一杯中書投韓愈情多眩肩拍洪崖徑屢窮
不信丹臺人去盡寒鳥猶自抱遺弓

翠微寺

山田層疊小如盂引水崖巔種稻劬竹院秋閒雙塔靜
僧雛掌上飯慈烏

桃花源

蔚蔚林深自濕衣日含山氣霧氣飛因愁潏陰無平路

遂令幽人去不歸

許楚

自茶庵至石人峯宿文殊院

憶我舊時到石人峯已尊坐臥恣餘喜儼與夙志敦踞
石擬寤日狂叫庫崑崙載陟七盤上春曉逾夏暄拳膝
幾萬級始云天都根放眼得遶廓羣峰豈暇吞怒焉鄙
初志燕雀譏鵬鵬回視杖脚烟石人真見孫洽西特森
秀崖截如折輓兩松輾轉之一木媒攀緣郭索探微磴
壁面幾無言延頸豁石罅相顧何消魂自有宇宙來此

竅如覆盆神鬼費呵護虎豹供隸開祕密數千載開鑿
待普門下有紫玉欄上有蒼虬庵樹腐節作枹牖出雲
濕禪飛棧蹲老柏翡翠成籬藩褰蘭蒨氣鞣無砂土
痕松石若屏息草蟲不敢喧裂嶂敞紺殿怪藤騫寶幡
兩腋翼龍象僊鴉同佛殣遶座金蓮簇萬頃兜羅翻一
宿筋骨輕再宿翎鬪蕃風雨竟無忤何當報佛恩

梁一枯木渡始信峯更得絕巘數密

自此棄拄杖先後序頭足冒險奇足償買勇勍難住乘
興忽已登歸慮亦遑顧倘屬下根遊何暇領佳趣

帝松歌 有序

惟黃山松寄命巖罅飽吸石髓養成沈蔚壯激之氣
以受霜雪之變所云榦不暇枝枝不暇葉輪囷偃仄
拳腹短穎無小無大都入散聖獨散花陽一柯志名
擾龍差戾偉幹張鬣擎天酣與峯鬪峰化而謬輟其
勢有坐臨百辟驅役羣雄之尊三千年之蘊成飛節
十八公之戴爲元首混沌以來不知其幾歲月也山
澤颺言爰作帝松之歌

不知世界有奇觀不到黃山散花陽喬柯百仞飛游龍

屈鐵蟠根無寸土，猱狸奮鬣擎青穹。紫甲銅皮繡雷斧，
破峯闢石怒不休。萬馬奔濤向空舞，下枝拂壑雲忽收。
上枝盤旋蔽風雨，玄霜赤電增威儀。日月星辰營臟腑，
畢宏老手畫難就。孔明廟柏疑儔伍，離奇放誕何處來。
造化生時亦無主，蒼顏袞袞空徂震。且有松俱臣鹵，
軒轅皇帝曾種無。秦家大夫歸版圖，根由試問抱樸子。
鴻荒未剖原稱孤。

送汝南秦楚望入黃山

過山徒讚歎，終似未來時。險待昌黎慟，奇驚太白詩。暮

登絕頂原不戒貪痴跛爾驅筇去天都建大旗

上秋雲牖得臥龍松

浪挾興公賦經營此盡非陡須猿臂接幽至鳥聲希覺
路勞先輩登峰奮後衣翻於壁壁落翠逗光輝

憩趙州庵覓登石人臺

舊日茶庵是精廬老翠封俗傳龍送石僧說佛留松歇
杖看雲滿凌峰笑鳥嚙石人台代客碧髮恁蒙茸
翻石崇禎間爲山瀑移至庵左上載一松

庵腋有龍

再由兔兒石尋蓮花峰還不得

兩經兔兒石柱杖全無功但羨鳥生翼幾如魚遊空路
生疑路處峰在破峰中此地許誰到毛公與雪翁

毛人
卽紫

雲樵者所紀普門師呼白猿爲雪翁

住蓮花庵聽慈光寺梵唄

秋來風味更空寥昏曉香厨乞一瓢五百僧埋黃葉脚
一雙鴉出白雲腰珠函寶笈填香海雲袂霞衣降紫霄
長記石蓮花瑞見神宗皇帝盛明朝

同老僧萬水尋紫雲谿過一線天

紫雲溪釀碧琉璃曹阮移家洵有之路盡可尋誰自棄

峯來無理始能奇，龍從拔壑千株起。崩岩介天一線離，
秀透玲瓏隨足是。更添香翠染鬚眉。

送俞去文秋入慈光寺聽講楞嚴

山人遊輪已足奇，况逢花雨晚秋時。長鑱採藥無名氏，
破衲巢松老導師。見水忽參潭氣定，入林休作雨聲疑。
高寒自此辭禽路，細和胡麻鐵笛詩。

尋僊橋路喜逢月塔倦住草庵

放參惟聽隔雲鐘，五月桃花紅正濃。盛夏客來尋古雪，
孤峯奧處補奇松。俗游草率都稱快，名句推敲已盡庸。

月塔僊橋非恍惚只緣屐笠失從容

宿蓮花峯頂示性空禪宿

華山移置大江東十丈花開一萬葉我又重來吹鐵笛
月明峯頂和三翁

高寒竝絕雲霄氣住定何愁不入僊欲就團瓢消歲月
峯泉只結一僧緣

宋先儒吳古梅咸淳間偕鮑魯齋宋足庵月夜踏蓮
華峯頂余於皇明崇禎戊辰來登此峯考其時蓋六
閏甲子矣

汪家珍

藥銚

水石相輝空明無依澹爾忘歸

醉石

不勝杯棬頽然欲倒沃之以泉點頭曰好

鳴絃泉

琴之理藏於此敢曰知音高山流水

方撝謙

登黃山

天外三峰陡如削桃花曲澗通幽壑樹杪高挂百重泉

直疑倒瀉銀河落平窺下界多烟霞願攜雞犬卽爲家
田可躬耕飲黃犢還宜煉藥浴丹砂須臾颯颯風雨至
雷電奔轟晦天地若非潛臥蛟龍驚定是探奇鬼神忌
朝來雲滿海天秋頃刻萬狀不勝收回頭依舊千峰霽
日暮芙蓉紫翠浮

江 益

遊黃山

人間何處覓僊蹤望入寒空翠幾重訪瀑穿雲過絕壁
荆蘿辨路出層峰名傳異代亞丹井客到真源任短筇

思向天門生八翼憑凌三十六芙蓉

憑虛直向萬峰前岸幘臨風思欲倦日照玉隆天十四
人疑金色界三千丹梯蘚積無樵徑大海雲生見釣船
蓮蓋峰頂有石舟笑拍洪崖肩暫息山居一夕勝千年

江嘉梅

讀書黃山詠懷

躡屐登雲入萬山直從天際恣躋攀峰高雨勢飛筇底
峽靜泉聲出樹間待斫藥苗醫宇宙難將丹粒駐容顏
但能有補吾名教舌吐蓮花只等閒

紀映鍾

史遠公以黃山遊記見示奉答

君從湯口尋山去直入千峰與萬峰
纔有路時三磭雪絕無人處一聲鐘
雲綿忽漫藏丹竈瀑布長懸濺白松
披寫幽情隨意出卻疑拄杖是蒼龍

顧宸

黃山遊記詩

并序

今人遊黃山者多矣不能作記作記者亦多矣不能
使讀其記者如遊黃山且歎於遊黃山蓋不能盡其

勝不如勿遊不能盡其勝而遊不如讀記讀不能盡其勝之記又不如不讀夫天下名山奚啻數百往往讀古人名篇而躍然如登覽焉以其文也更有因文而山以傳故讀記勝於遊山也然余讀黃山記不止數十篇而黃山仍如未遊故日記不能盡其勝不如勿讀也今讀程子非二之記黃山之勝歷歷目前余雖未遊如已遊矣乃作長古二百二十韻以歸之

夙昔慕黃山黃山不可企遊記束牛腰大都山靈累棄擲亂帙中兒童裹餅餌豈無大手筆山奇擬不易旣到

新安城紫陽隨躡屣桓桓汪將軍烏聊曾賜諡山頭問
政來惟弟知兄懿披雲揖太白飛布積空翠其餘更僕
數品在中下駟惟是古巖院惜爲遊者棄窈然洞外泉
歎其拔乎萃處處見黃山莫測原與委相傳軒轅氏諸
侯輯五瑞浮丘爲之臣容成佐厥治化民既有餘昇天
惟所使髦年鍊朱砂丹臺從此始山因黃帝名亘古到
叔季綿亘八百里僊佛雜分司奇峰三十六激潭二十
四更兼洞十八梵刹尤比比大寺繫小庵纍纍若懸璫
激潭間流泉珠散如剝蔥溪洞更淺巖鳥獸落殘甃奇

學欺衆巒俯視兒孫位種種狀難名秃筆安所爲我今
願往遊如覆土一簣千仞可上扳發興乃得遂將欲覓
同人先期蓄契備濟勝揣未能昌黎且自譬我友程子
來袖出黃山記揮毫信有神作者一時避搗摩極毫髮
登眺兼寤寐想當經營時其爲物不貳山中鹿與鶴應
助君幽異毋乃木石精枯盡千年淚茅庵多老僧白日
正欲睡扶杖爲君出烹茶潤顚顚曹阮拂鬚眉咳笑忻
然至願借文章觀僊棗無數饋長蛇磨厥牙猛虎昂其
鼻古色俗眼噴奇光異物伎山松生夜涼飛泉響空際

聽君握管吟願執干雲轡從前擅詞場自顧如鬼魅間
有倔強徒操刀刺君臂我讀一再過不敢正眼睥乃復
三四觀毛孔俱作喘載硯巨鰲鱗捲毫大鵬翅興公讓
刻畫柳州遜精粹從此黃山遊恍然悟其自云自雲門
峰湯口入湯寺三丰筆跡存滿壁龍蛇肆朗吟詩句新
僊遊信非僞仰眺軒轅宮夕陽頗奇麗鄭公釣石邊虎
巖有奇致桃源忽怒雷龍潭黑色閤洵若溟渤寬萬壑
寒濤恣孤存舐浪閣面山點一痣殷殷出磬聲蓮庵茗
初試昔者吾友鮑於此仰塗慨遙望諸奇峯植圭拱而

侍攜襖自祥符竹器取酒醉同遊二三人相對舉一觴
淨土有毘牀天然施格第玉蘭根作架懸鐘眞寶器拂
拭何年物元孫建文誌四鼓下龍潭苔淡落葉掌噴沫
便作寒恐犯潛鱗甚早起到溫泉沐身兼櫛髮云是火
龍涎澡久偏滑膩隨尋舊藥鉤鳴絃泉若遂歸飯薌石
谷金佛聖恩賜木蓮高五丈花香先入牀欲謁普門墓
荆榛雜棘棘急叩老人峰雪藤不可覲爲位哭鼎湖至
今涕如泗雪藤雪庵流旣死誰爲祔再登龍蟠石虬松
亂針刺又陟小心坡窟壓煙霞步凌飛嶠側身窺

後墮藤花雜珊瑚石鱗擬鳳翥此地忽臥龍諸葛成何
事萬爪怒戟張似恨吞吳志入巖路不通一竇開薜荔
井深百綆汲譬若懸權錘捫棘懼手龜騰蘿防足跛俄
從地底升嗥嗥犬聲諄疑是劉安家犬亦僊所嬖始到
文殊院萬笏空林植天清來妙香俗遠無險諛幾几共
瓦甌冥坐類枯槁夜半佛光見滿座彩雲氎五鼓看殘
月月影銷弓韞待旦復畱連端爲奇觀滯左爲天都峰
巍巍天不啻雲物飄渺間玉珮珊珊綖醉僊石屋舞天
馬憑虛驚轉盼見青牛勢若捲角特彷彿尋玉宮願作

司香吏萬古無凶荒千年絕烽燧右是蓮花峯峯高繩
絕縊先從蓮溝下山僧與我臥方行一里餘風聲欲塞
珥雲梯拔千尺壁立無可誘微茫尋小徑硤硤更幽遠
忽開一線天石罅適與仙龜甲高丈許身反爲所礙以
腹附石尖尖峯腹直剗折腰旣不容短光難直眙過此
盡蓮花枝枝香若穗霧障剗然披午日當空曬同人踴
躍起仰天三致喟息肩又兩日買勇登峯次瓢古挈香
醪簞輕貯鹽豉初上不受趾下梯絢作縋浮梁裊裊飛
滑石鑿卽離藤蔓絕攀援奚奴以手攀努力踞其巔匡

君望迢遞醴泉鑿於天香沙掬滿地前遊或有人後來
懼不繼少焉蚩尤暴踣踞足欲脰怪聲搜孔竅形面將
剗則恐遂乘風飛當空下一鷲俯視危線縷凜凜合雙
背荷庵芥子同巧從蓮瓣蓋叶程子昔所名榜書有奇
氣徐下百步梯依然躡雲背登峰固艱危下山難以倍
驚魂一宿定天海往盼睠西南峰亦奇森秀出岑蔚喝
石見清狂倚杖足夕對如何十里霧瀾漫而巖對躑躅
泉石中維谷同進退忍饑問前途跋涉心旒旒老僧宇
景賢相迎擁枯筇引入天海庵溫露迎身漬冒雨鍊丹

臺載拜無一費君臣各上昇雞犬得其利旋歸指月庵
惟歎夜何其同行悄不眠景僧足亦厠聽其說天都跳
躑了無異自去學猿挂臂長力不費途徑閻羅壁猿嘯
出非意龐肩似老翁擲果偏作戲呼之笑不答嗒然將
足跛少憩藥師殿雲湧白光賁一片虛無根恍疑太古
遺同遊踞石吟得句如僊昇相與尋海門四顧海黏埴
濕雲飛不起遙聽濤聲凜知近師子林獅形壯且吳借
徑散花隄泉澗路傾陂因過始信峰松密翠如織尺寸
未肯高天生盆盎置上顧不容屋石室小如鎖僊掌削

劍立鸚哥側眼視異跡耐婆娑僕夫免冗瘁最奇擾龍
松見者尊爲帝但未點其睛着水卽恣睢往探光明頂
拖霞弄脩被二鴉大於鵝山僧將食施聞其孔子時銜
出山外僂異哉物猶然人不如鳥智再陟平天石前後
海軒輕鋪海真奇觀變幻人間世須臾紫碧散峰巒鑒
髮髭決志登石筍厥狀非一類禪參玉版師狐兔不能
食友人達海門驚呼共曰昇峯根拔地起竦立仍密紋
僂形鬼怪形浮屠七級積達磨折韋來大士跌膝示何
物作蒲團蒼顏摩頂伺倏忽海門開光閃橫側出百尺

樓高千丈虹橋細羅宮寶藏興蛟室竄珠泉

史記珠泉

泉古暨字借押

石罅入風鳴笛作梅花吹急促程子觀望外非

所冀魂魄已怒飛疑遭山鬼弑皮蓬道上行異卉密於
概雨露自然濡莫識爲誰蒔卽到兜率庵合掌稱慚媿
蜀僧不解衲十年過奔駛蒼山伴枯禪惜不聞妙義
級白沙上佛燈光又被始歎僊燈洞容成爲之秘矢志
遊松谷遂誤足還躓遙知疊嶂奇日月相虧蔽乃入丞
相源紺碧莊嚴飾溪潭蓄且洩九疊泉聲亟山人飲其
泉終歲絕腹痢程子足欲止最高造物忌大抵名山勝

近者忽不嗜奇莫若峩嶒三蘇無一字匡廬甲天下歐
曾置弗議程子黃山人爲山樹赤轍往還兩月間上下
類飛騎上山飽目力下山開腹筇上山茹苦菜下山啖
葷葷爲言何處雲雲徬見日明爲言何處星星乾石底
墜爲言花似菊馨香過茉莉爲言竹萬叢筍根嘗見穉
爲言誰朝殿靈光今獨歸爲言某僊官儼如封有庠斷
碑秦漢存古跡隋唐詒秋月有棠開春天無鳥孳石苔
化木菌山果結楊椹豎子牧牛羊樵人伐條肄記所未
覈詳滾滾談不置自想歸家後數日心猶悸事罕欲語

之反向高聲言回視白嶽巔此遊信勞勩今觀程子文
癢癢心又悸老馬不問途昂昂千里驥我願宿春糧執
鞭從所帥程子如再遊草履恐爲黃程子不再遊斯記
亦非二

蔣超

二
湯口不寢

點翠黏藍月半丸下山情似別離難誤人好事長鳴洞
不放千峰入夢看

施閨章

黃山志定本 卷七

賦詩

美

浴湯泉

黃帝鞭赤龍銜珠地上走長驅暘谷水騰沸成仰漏其
下惟丹砂百靈司左右憑欄如蹈空解衣若飲耐濯物
不辭汚懷新無宿舊隨意稱暄涼齋心得枕漱掩蓋交
藤蘿暑寒改氣候旨口試蔗漿竟體霑蘭臭三浴入毛
髓自視或眉壽靈域局萬山車騎罕脛就猶嫌碧石泉
鄴澤染紅袖作詩銘倦都長使神蛟守

驪山溫泉名峯石

鳴弦泉

太古無絃琴片石橫絕壁時俗昧文辭風泉自夏擊山

中秋雨多松際寒雲碧昨夜復何人數聲吹鐵笛

登老人峰

觀化百代後獨立萬古前時時嵐霧裏濯濯冰雪顏俯
首見白雲舉首見青蓮軒后既冥邈藥鼎空聞傳鍊身
躡峰頂把袂親拍肩欲語若凝盼夕陽在前山爲問容
成子螭駕何時還

雨止登鍊丹臺

嚴秋劇凜冬夜雨庭飛霰簷際青蓮花曉起橫匹練忽
如丈雪溪戶外看不見圍火蒸松根縮手謝書卷向夕

一開霽風吹裂雲片倒景射丹臺四山紛素綯仰矚天
欲翻俯窺谷彌眩羣峰盡骨立拔壑起峭嶮龜影標浮
屠銳形躍長劍回巒競侍從羽騎森飛戰惟餘九龍峯
輕綃隱半面舉踵狀候移倚杖晴陰變軒后事渺茫百
靈還繾綣懷新矜異賞憶往薄最美始知風雨心畱余
究美善

自西海門登始信峯至石筍砭作

漢武企蓬壺謝客思廬霍崎嶇此層巔假說難可度獅
巖旣踣蹙九龍復回薄遂窅開虛無海藏尖局踰珍貝

壑中陳鯢鯨谷底躍馮夷破幽宮白日逢不若連巒疊
層波危巘竦丹雘人煙乍晦明緬躬辨山郭迴策磴屢
紆孤峰吐崖崿果看野猿供碁見僊者博圻峽斷俗鈇
孤松橫畧約峰頭石室存鐵壁成斗削長江練一縷九
子蓮纍萼俯窺散花臨丹黃紛漠漠延賞垂景石筍
驚解箨萬指攢青冥高標各鋒鏑其旁無附屬兀冪露
斷齟瑯樹作弁蓋鮮雲帔約造物何狡獪巨靈苦創
鑿苟非馭風人實恐山鬼攫扶險情自移采真理無作
逝將餐薊英重來躡芒屨林壑不吾嘲當果浮丘語

白龍潭上桃花源作

黃山峯壑幾千曲客遊先就桃源宿
杖底殷殷雷繞身樓頭洶洶濤崩屋
清夢全醒風雨聲淅林匹練中宵明
曉起白龍掉長尾四山飛瀑來喧爭
怪石巉巖何排盾戟寒潭冰雪澄空
碧隔溪古寺斷鐘鐘在空勝絕絕壁
匡廬三疊天下稀蒿嶽九龍稱神奇
何如此地獨兼併咫尺衆壑蟠蛟螭
複磴叢篁白日暝還沂華鉞尋丹井
轟磕不聞人叫呼倚杖空亭發深省
問君蓮花庵在無連朝細雨山模糊
屋角一圭破雲影青鸞舞處看天都

藥谷僊源難具陳琪花紫翠秋爲春憑君傳語武陵客
笑殺桃源洞裏人

中秋夕坐光明頂看月歌

同洪美周江允疑許雪懷是夕允疑吹鐵笛

人間何處無中秋誰向僊巖絕頂遊白頭牖下苦詰曲
浮雲轉眼空煩憂君不見黃山天海光明頂橫絕千峯
冠萬嶺芒屨踏破層巔雲石鼓人歸日未暝夕陽散映
青山紅珊瑚萬樹琉璃中絕壁寒光出滄海赤霄皎月
隨長風雲門僊老影重重九龍旖旎羣追從坐指蓮花
見花瓣遙窺玉女臨蚪松此時大笑皆拍手香溪客到

貽美酒割吾炙傾一斗客吹笛吾擊缶昨日風雨今日
晴天上良宵真不偶銀漢疎星明玉盤山蔬野果資清
歡眼底高擎出僊掌勸我把殘爲加餐獨憐五老墮雲
霧相思不得同盤桓夜未闌露將溥白鶴唳兮回青鸞
翠雲裘蔽天風寒於戲萬古此山此明月何人不愧峯
頭客嘯翻雲海倚天闌

黃山怪松歌

效古人純用仄轉體 松有把門臥
龍破石蒲團接引漫龍之目

山中老松多詭絕風伯手揉雲綰結青枝如組踵屈鐵
根似引繩長百折高可尋丈短尺許寄生以石不以土

餐嵐飲霧無凡姿，倒身拂地翻蹠舞。天門以上兩翁立，
一迎一送相拱揖。向人兩手儼開張，笑語有時風習習。
盤石團團翠蓋擎，僧趺細雨衣不濕。曉晴一線巖前坐，
倏駭蒼龍眠欲墮。騰身逾峽復斜空，片石在諸襟成負荷。
又過雲梯各呼咤，破石松生蓮萼下。松生利劍刺山頂，
迸出青霞穿石罅。平天石畔蒲團好，數人歡絕倒。
軟鋪熨貼貽阿誰，應待維摩及三老。蒼苔野火燒半枝，
雨漬雲滋未枯槁。峰尋始信竇為遠，斷崖恰賴孤柯接。
似伸猿臂來引手，位置欹危通步履。左啟一峰等卓錫，

突出倒垂翻峭壁糾纈奮角肆盤旋烟靄冥濛纏霹靂
徐看知是撥龍松或稱帝松莫與敵趾無梯磴謝攀緣
膽裂狼孫愁搏擊其餘萬樹難名狀石竇山腰迷背向
曾見軒皇鍊藥年瘦筋絲髮今無恙離奇睥睨人間世
盆盎移栽空好事徂徠山麓盡凡村天台橋畔差比類
我今作歌非癖異笑遣胸中桀礪意廐多肉馬怪龍螭
時俗徒誇梁棟貴

暮登文殊院

削壁無門人盤空有棧懸飛來一片月照我萬峯巔松

葉出寒磬蓮花明暮煙此身僂骨未仰首問青天

登蓮花峯頂

絕頂看誰到憑陵一老夫路皆穿石腹身已坐花鬚片
日斜飛下羣峰半有無稱心風細細垂手接天都

書鍊丹臺側指月庵

天海浩無涯孤僧寄一家泉吞丹井月坐對青蓮花小
屋嵐烟重高臺石路斜雪中人跡斷燒葉自烹茶

雲谷擲鉢庵作

僂掌稜稜拂紫氛層峯回合檻邊分何年書屋成僧舍

黃山志定本 卷七

全

有客秋巖坐夕曛古鉢誰翻千仞石寒鐘難出萬重雲
龍泉日夜潺湲去流與人間幾處聞

許啓洪

明人誤入

從山口進黃山時微雨看峰頭雲色奇絕

雲高千尺峰如戟上海下天遍峰白杳杳冥冥帝之宅
五丁六甲還爲役怪雲騰空猶電疾忽閃忽飛如劍客
停輿冒雨縱觀覽目光恂悅眼珠碧雨在雲之足晴在
山之脊倏而山腰雨復晴翠竇欲飛霞可撫有石齒齒
雲激之一步一換雲爲異奇哉峰色總雲色頃刻雲易

學亦易我聞軒帝紀官曾以雲何不以雲還記石

黃山看鋪海

我觀黃山奇峰三十六非關天巧神僊築神僊樂山復
樂水變山爲海仍在谷忽然白氣石罅起蕩瀛波光一
縷始頃之便是江淮河山水平分尚可指倏而水天變
一色幻海於山疾如矢藥谷有白龍擲鉢有九子豈盡
吞雲駕霧來吐出黃河天上水山靈顧予笑而言子盍
乘桴浮於海予謂觀海有術宜登高盍曳杖乎光明之
頂與蓮花之背海之前後左右間收入眼眶一寸耳斯

時晴光散長空露出山椒如螺如髻如花紫久而視之
空明互澹上海下天真如華嚴楞嚴傾瀉琉璃世界差
可擬至若雲氣浮沈滅沒風行水上編珠貫玉容與乎
海嶼與蛟宮松風撼雲雲作聲雷鼓轟掣澎湃鏗鏘萬
丈飛濤颯空雨噫嘻觀至此觀止矣忽而神倦觀海倦
海又變山秋紅海底綴珊瑚削出芙蓉紫巖裏衆峰齊
出拱天都天都巍然仍爲百谷主萬頃白雲安在哉高
歌拍手文殊臺

始信峯

每作天際想於今有是夫附庸稱石筍鼎立通天都
靈鳥飛驚落剡龍矯欲呼僊凡從此隔接并賴松扶

雲梯

曲曲桃源路已迷遊人莫倚得青藜老猴笑作吾前導
百尺竿頭說有梯

前海後海

漫發三山採藥舟神樓十二卽峯頭秦皇漢武真堪笑
只向蓬壺海上求

蓮花庵鐘翁建文年號詩以慨之

遜國鐘猶響過雲梵聲同帶夕陽聞試將木末祠鐘考
可有年猶記建文

屈大均

蓮花峯篇贈閑賓連

我昔入秦關手攀太華峯千峯爲蓮瓣三峯爲蓮蓬二
峯只一石一石三芙蓉紛紛蓮花數化作千萬松白帝
與明星宮在千葉中高高五千仞偃掌擎當空自謂天
下奇羣嶽不能從何意一黃山蓮花亦次宗一莖上竄
天千瓣開濛濛從莖上至葉吹墮愁天風盤迴穿巖竅

忽見軒轅宮峯凡三十六此峯太華同夫君幾登陟身
染蓮衣紅自作黃山經神與山精通文章亦巨靈開闢
將何窮

送韓石畊入黃山

我聞黃山有湯泉軒轅浴之飛紫烟瓊樓珠闕萬峯連
瀑布爲梁度羣僊白雲瀾漫如滄海丹臺石筍忽不在
天風吹開金芙蓉中有日月紛光彩送君歸去餐日華
桃花片片是丹砂三日容顏如玉女却來同我登青霞

天都峯

縹緲丹臺上軒轅擁二僊玉壺甘露瀉珠蓋彩霞懸日
月生黃海笙歌滿碧天龍額攀莫及悵望淚潸然

汪扶晨在黃山詩以寄之

僊人湯沐地天子翠微都一片黃雲裏芙蓉影有無松
聲搖玉柱花氣出香罍君愛西峰好琴歌定自娛
萬疊翠氤氲天風吹不分飛來一片水散作四山雲峰
影花中見溪聲雨外聞紫床將碧枕高臥美夫君

題汪子鼎文治始信峯隱居

萬仞丹梯上天開三海門如何落雁外

落雁乃太華絕頂峯名

亦

有蓮花尊石筍口已長湯池冬更溫嗟君兄弟好鸞鶴
自相存

黃山雜吟

千峰雲起白龍潭玉乳泠泠滴翠巖彈罷瑤琴磐石上
臥看秋月出松杉

一聲天上玉簫來三十六峰花盡開向夕軒轅邀飲酒
騎鶴更過紫陽臺

送汪扶晨奉益然大師靈龕歸黃山

君家主政事真乘日夕焚香禮孝陵一代遺民金粟佛

兩朝高士雪庵僧

沙門自古非高士漁父由來是大夫
汝愛吳山尊宿好遺衣猶爲作浮屠

誰能五日學三閭蟬蛻人間返太虛
喜爾曾爲騷弟子不令遺骨委江魚

千秋知已是湘纍

師有知我惟屈之語乃絕筆書也

一讀離騷淚便垂

禪寂未消家國恨愁心常被朔風吹

精爽應隨軒后去雲霄一路拾龍顙
未應列在高僧傳公是郎官復孝廉

軒轅宮闕在黃山萬仞丹梯爾重攀石匣故應收舍利
遺書還與散人間

程從伸

湯口曉起看雲口占

朝來曳杖採香芸遙見天都頂上雲
纔展登山雖逸事無心去住卻輸君

贈慈光寺主僧無竈

昨宵隱隱雌雷啼爲問山僧知未知
僧向余言君識不匡牀正是睡酣時

啣石居

藤蘿捫盡磴將窮絕壁欣逢棧一松更有秋容寫不得
白雲碧漢映丹楓

張異卿

過老庵基

五里十渡溪山徑不容足側行如有循乃到山之曲懸
巖相對峙霜樹綴紫絲短松不盈尺蜩縮何局促孤庵
踞崇岡中有僧無欲枯坐學刀圭童顏美如玉看山有
時閒勤勤滌脩竹

趙吉士

桃花菴坐響雪亭

曲逕青苔濕森陰厠寺門懸巖飛雪瀑亂石碎雲根萬
響搖空碧諸天抹一痕虛亭吾獨立魚鳥尚寒溫

慈光寺

客到山門噪白鴉

凡客至鴉輒鳴向
禪堂僧卽出肅

佛光四面現曇華

鐘魚隱隱傳天梵臺閣層層簇石霞百轉時聞山樂鳥
一株獨放木蓮花長空碧落流丹液好向雲中汎月槎

文殊院

曲磴天邊路百回此身長徬白雲隈看山有膽雙眸豁
鋪海無聲萬象來夜放佛光人指月四月一日宿文殊院更深夜忽曉山鳥齊鳴神像鬚眉畢照予異之羅景明日好月好月夫朔安有月語未終黑暗如舊佛燈熒然上升旭
日下鳴雷文殊座出懸崖頂趺坐忘年長綠苔

蓮花峰

一望空蒼未有涯海雲千頃泛蓮花落灑練影橫三浙
點點烟光簇九華崖隙尚留春藥水峰尖長挂鍊丹霞
懸松臥石皆成象半壁晴光半雨遮隨看各成一象物形畢具松石之奇

世間
少有

吳雯清

宿文殊院

曲徑尋幽上穿雲夕色妍寒風吹石壁落日照松烟客
話圍爐火僧茶汲澗泉一燈禪榻寂高枕萬峰顛

晚入藥谷

青鸞峯下步遲遲爲訪幽居足已疲穿壑板橋驚欲墮
隔林茅屋望猶疑桃源舊徑依津問藥谷孤樓倚石窺
僅有殘僧相對晚寒潭清嘯少人知

狎浪閣

結樓栖樹杪天半發清吹泠泠驚石龍恐有羣龍戲

周 漁

黃山

三十六峰次第攀此身寧復在人間記今遊歷曾非夢
疑昔登臨未是山有路雀禽飛不到無知松柏老能閒
更從何處尋丹竈莫使匆匆鹵莽還

釋震朗

游丞相源訪無易上人

看到谿烟亦不凡山奇寧畏路嵌嵌尋秋客過蒼藤杖

帶月僧歸白木鏡樹裏鐘聲羣谷應空中鉢影半雲銜
知君住處幽無限紺閣新成聳翠杉

吳曠

由小心坡登蓮花峯

嵯峨一線望中分削出芙蓉迥不羣萬里忽開江海色
千峯歷盡古今雲捫蘿徑仄凝寒翠拄杖人高受夕曛
玉井蓮花誰得似天雞啼徹已聞聞

黃士塤

黃山

問訊黃山道登臨及夏初溪雲常近樹野翠欲侵輿落
日開蒼嶂清陰散碧虛耽慵吾有素此興未全疎
小憩溫泉畔披襟向淺瀾自令心益淨不與歲俱寒
帶時堪結松纓曉未乾何須勾漏去靈境足盤桓
策杖登林表幽奇豁素懷蟠龍森老樹蹲虎慄溪厓
五嶽游何日三山迹未乖振衣還一笑天地豈塵霾
峯頭松樹好翠色日氤氲數尺偏饒致千年迴不羣
托根全在石結氣半依雲滄蕩臨風意惟應靜者聞
仄磴人彌罕崢嶸勢欲高憑虛生羽翼俯眺盡纖毫
雲

氣吞朝樹風聲鼓夜濤倦游還阻雨岑寂付村醪
信宿文殊院山靈浣俗氛猿聲清落月鶴影迸重雲
梵徹松風和鐘疎桐戶閒翛然天路近無事歎離羣
籃輿山下路遊歷正炎侵寧識孤雲勢能生萬里陰
虛寥增道念澹澹得禪心丘壑縈幽夢他時倘再尋

前題和俞澹庵

黃山壁立當天半聞昔軒皇曾御龍鶴馭音容參碧落
鴻蒙日月老青松風清懸瀑千林靜徑轉層雲萬壑封
二十六峰通帝座便應揮手蹕僊蹤

黃山志定本 卷七

東詞

允

嵯峨積翠鬱僊臺曲徑干霄亦壯哉疑有鬼神通一線
遂令天地割中間浮雲盡出幽巖下飛鳥應從半壁回
夜靜冰壺堪濯魄更於何處覓蓬萊

濟勝寧辭行路難扶筇烏道歷千盤青巒次第排雲出
白日蒼茫入夏寒嵐氣朝昏非一狀山形咫尺幻無端
天風萬里舒懷抱濯足蓮峰大海濶

吳嘉紀

寄題汪子鼎文治始信峰草堂

海水藏蛟龍不拒鰕與魚世人爭入山誰賢復誰愚田

一賦美瑤水還舊珠時危在鄉曲貧賤懷亦擬高山
非門前去去聊卜居石煙淨毛髓天漢涼衣裾未遑問
治亂且自全我軀兄茅而弟堵築室何劬劬

茲峰嘗夢想今到峰上頭松瘦氣長清四序如深秋開
門臨萬象散髮人悠悠雲生散花陽水白蓮花溝日月
走一壁階庭凌九州移爾昆季情銷人古今愁鄭圃寓
于林社山棲吾丘青青千歲猿招之從我游

眞僧乘化去精舍存遺趾

僧一乘曾於峰頂構定空室

步虛何代人

道士瓢笠宿於此石竈冷無煙白月竈旁起覓然來獨

坐復聞江烈士

石壁鏡寒江
千偈坐五字

清飈卷獻雲飛鶴投泉水

卒逢君父難褰裳別桑梓髮過三山豎頭擲九衢死何
用蓮花青何用靈芝紫烈士卽倦佛吾慕寒江子

王 焯

文殊院

石竇逢雲棧飄然出井中振衣臨萬仞左右來天風蕭
悲凌高寒指顧窮始終蓮萼倚晴霄天都接穹隆分行
儼相並次第羅諸雄鉅鹿戰未合塗山謁初通提攜奏
斯院弁命靡異同蒼苔夢虎歷紫鈿起神工猶疑太乙

礎未墩終宵紅倒景入空沒暮色移孤筇茲境可長據
無爲美空峒

蓮花峰

曉從喝石來半壁沈秋天鶴嶺數百銜扶藤破蒼烟空
翠潤我肩輕嵐積我肩始及靈峰根孤情挾飛倦仰視
畏復貪決計無遷延未丈股已慄山童翼我前膝挺力
不任踵虛勢難全所恃石面濕蟄展如着經盤盤入復
出有若蠶蝨穿怒勢起未已欲共榆桂懸雲霞下侵趾
罡風上摩顛俯瞰萬壑濺贅我恐不堅諸峰信見孫天

都做喬年移神御絃野妙語間期佳香砂贈四五郁郁
精氣傳從此髓盡絲卷龜入重玄寄言後來者毋使中
道還

哭松歌

黃山之峰如走鐵陰火潛烘有時裂孤松於此託萌芽
怒幹膠枝總奇絕春風吹根土氣微更滋石髓迎朝暉
百年走險勢未盡千載始得凌空飛煙鬟霧鬢矜曉緇
偃仄紛挐長苔蘚二龍天矯龍莫比接引蒲團巧難開
其餘尺寸皆可珍踴距戾肘疑有神嚴霜不翦綠龜甲

好雨時洗蒼龍鱗人間頑土豈能植自遲天全依崩岸
誰將一炬傳林壑山靈有口呼不得垂鳶懸羅盡死灰
黛影嵐光失顏色樵斧相逢不空傷使我吞聲怨何極
跛虎學龍幾處殘但餘朽骨埋荒壙沈姿還仗東皇起
來歲青青或爾看

數年前太平采樵人縱火焚山蒲團松幾爲烈焰所
焚蒼翠如故山靈之幸也吾嘗以此詩以紀其事天下
奇觀願住山人共保持之可耳

普門和尚塔

茲山蟠太古滄海不知年闕許雙猿探靈栖九子偏客

來情沮險師至運開天短衲朝朝出長鑊處處前杖頭
襟落日眉底結霏剡鑿石盤虛盡穿崖得蘊全秋旻高
爽氣春雨壯奔泉瑤草真妃采焦茅羽士蹇奇踪流浩
劫遊事紀諸賢臘比松枝老禪窺柏子先高名尊帝室
沈璞臥枯椽幻質隨朝菌閑階長壽潛溪毛何足薦歌
詠播三千

題漸江老人始信峯圖

紫雲千堵削秋容不信人間有此峯記與老人松畔立
至今斜鬢帶烟濃

題畫

宵來夢入黃山道
晴閣披臨一認之
萬疊寒烟收不起
蓮花峯頂夕陽時

陳璧

遊黃山不得

生平常笑向平癡
山水寧須蝶夢時
只恐行厨無麥飯
餓來難上白雲梯

吳尚友

鳴絃泉

右宗嫋嫋自成吟古語淒然欲滿林卻笑當年茆榻下
誤從指上覓知音

程守

佛燈

佛燈生大壑歷歷動空星秋瀑乍爲赭夜松能一青相
疑歸咒力不敢頌僊靈安測奇光內無余二子形

沈眉生先生住文殊院卻贈

家人從不拜郵筒言念松楸始一通性命孤存鉤黨外
文章半付鐵函中周遭石勢分迎拒頃刻雲光變始終

自有此山初避詔他年憑弔指龍提

文殊院坐月

崖下曾棲千歲猿
嘯聲剛可入詩魂
五更起看峯頭月
只許青松挂一痕

程羽文

遊黃山

山勢多奇削合脊
來無端翠挾萬松動
落落生夏寒身
影同一碧頓使衣裳單
巖壑費經營天意新
遊觀側下
就烟靜決立受風寬
飛鳥不妄鳴
宜情遂其安
領異事

聞見累月耽盤桓

異境縱身貪宛轉窺邃密草木蘊精靈想外立奇質同
峰別雨雲雲起前踪失萬壑撼波濤天風何凜慄奔崖
走赴人絕壁爭負日隨意拾一繆名款皆罕匹結爲孫
獲居蘊作龍雷室跼蹐不敢經靜言勉腰膝

入黃山奉東程蝕菴

劉正學

昔從澤國說奇觀一日何能閱一轡驟隸吉雲回首失
奔騰飛瀑側身看老僧細指三江遠瘴僕多驚六月寒
我得收山水癖尊鱸不足動張翰

陳輔

僊都

神僊誰說渺難求
咫尺峰頭是十洲
家近幔亭曾與宴
此來又作采真遊

俞綬

桃花源觀白龍潭

昔人記桃源插竹迷嚮方
至今千載下懷古空徬徨
行涉津渚迢迢望石梁
常恐梗周道片石支荒唐
一從絕壑開玄關亘穹蒼
或參玄脂蚪或鞭青鰐羊
倏忽婉

縱垂白龍紛南翔寒濤流茂碧浴此青珎琅攀顧號羣
臣萬古沈蒼茫遺蛻廣野間森然鱗甲張搏顙告爾龍
胡不九淵藏豫且一以多魚服何猖狂生憎爾族畱刺
刃膏其銖卻覆津頭水收龍返帝鄉

擲鉢庵

何年呈幻術擲鉢挂千峯境寂疑無寺雲奇欲化龍殘
燈參半偈清梵遍孤松惟有新羅鶴遙天未可逢

鍊丹臺

曾城崩劣五丁開舊是軒皇鍊藥臺峯外有峯青漢上

地根無地白雲腰
藤蘿看結羣真佩猿鶴從呼帝子哀
客自宣城攜句至
秋風搔首一徘徊

汪 逸

送俞去文遊黃山

一帶丹青屬兩家
我仍欹枕爾餐霞
壁間不少匡廬瀑
峯上分明玉井花

吳肅公

雪中下湯嶺抵焦邨

霏微蚤雪隱高松
着處寒冰拒短筇
芒屨信從青嶠落

丹臺背指白雲封山厨劈竹泉相遞村惟銜谿水自春
我亦悠悠心不競平林霽色晚從容

戴本孝

雲谷擲鉢禪院

白雲隨我渡谿來菜甲茶槍徧碧苔松繞峰身全石性
香收雨氣養花胎杖穿虎跡巖光冷瀑帶龍腥潭影開
自此披榛欲長往不知猿鳥可相猜

陳恭

浮丘峯

問道僊翁服食方樓真應自還泉香無端惹得軒皇至
俗卻名山屬帝王

芙蓉峰

霜質疑鵝白漢宮曉來如雪夕陽紅有時雲白煙籠處
卻欲相寒秋水中

施 礬

蓮花峰

誰種青蓮子開花直上天人來雲撲面身過石摩肩日
照半山雨龍歸一縷烟我心看不厭蓮蕊放何年

宿雲谷贈隱泉上人

九折龍潭瀑晴飛細雨絲
亂星明佛火隔洞聽僊棋
齋虎聞鐘慣眠龍起鉢遲
老僧真太古年歲少人知

崔學彭

翠微峰

曲徑苔花欲染衣
孤筇何處叩禪扉
鐘聲忽自林端出
知有幽人住翠微

程封

夜宿祥符寺題壁

乍寒僧共臥寂寂佛龕邊不到山溪夜安知鐘盡天四
更鳴謝豹千仞落湯泉忽覺青冥際光生一縷烟

查士標

爲友人題漸公畫白龍潭圖

我家黃山未識面聞說龍潭爲色變倒挂蒼崖百尺寒
界破青山一匹練潭水渟涵清照人潭中怪石白粼粼
桃花澗雨飛丹井採藥溪邊春復春紫霞倦人常曳杖
探奇巖巔或潭上夷猶坐嘯不知還濺沫奔流勞意象
時有巨然畫手奇鉢內稱龍勢莫羈披圖錯愕三歎息

安得驪珠迸入詩

魏憲

黃山書所見

山行百餘里冥搜全未竟雖歷伏火中峰高已秋令振
衣上天都羣巒悉趨迎閤洞起臥龍肅然生愛敬忽轉
別一天插石皆峭勁虛磴接危梯崩崖倚幽竅我本探
奇人到此憂虞并電勉敵天工下山遠松逕廓然佛界
寬慈光演大乘假我水雲寮鐘鳴始出定安得日在茲
山水共幽訂

同友人宿白雲洞

白雲畱一宿同聽海潮音
漁火空江亂鐘聲隔院沈
烟光浮半榻夜氣結層陰
忽唳松間鶴能清夢裏心

天都峰

棧雲梯石最崎嶇我獨探奇一杖俱行到日高峰
忽盡看來天濶嶼全無憑陵五岳雲堪贈沐浴三江帝可呼
何事英雄頻裹足不排闥闥問良圖

蓮花峰

不粘塵土卽青蓮况復娟娟倚半天
月映空中成九品

雲開洞口噴三千香分朱草添奇氣色奪丹砂獻異妍
絕頂何人先結屋朝朝花上禮金僊

光明頂

軒轅黃帝鍊丹臺傳有光明頂上開怪石抱松風臺起
高峰插漢月偏來遙瞻龍氣嘘三海疑聽鶯音震八垓
倚劍忽驚天地窄九華如髻綠雲堆

曹 釗

小心坡

我陟小心坡放眼增惶怖山狹勢益危半是敲斜路前

遂不可招後運不堪顧長根臥禿龍糾拏紛交互側身
摩崖背幾攫爪牙怒搖搖懸心旌失足將焉附惟險乃
自防到此豁然悟振袂凌長空夷翁駕烟霧

散花塢

數載思黃山夢想散花塢今始步高巔四望探瓊巖亂
岫起崑崙烟雲互吞吐轟地起千尋凌空勢欲舞怪石
砌危巒松根無寸土肖物復肖人爲龍亦爲虎奇巧疑
神工開鑿運斤斧一一費品題總非經目覩因歎天之
才度越罕倚伍羅列自橫斜未可繩規矩坐久忽生疑

雙眼紛無主本是看山來翻入河陽圃飄然馭長風一
嘯衆山俯

文殊院看鋪海

冒雨宿高巔雨歇天風吼夜半落松聲崖谷虛能受問
僧鋪海奇僧云初霽後曉起披衣看濃霧堆窓口須臾
海勢成一望烟雲數旭日動微光晶熒天欲剖蕩蕩波
濤翻隱隱帆檣走天都與蓮花對峙如小阜其餘盡渺
茫滄桑信非偶回首問同人變化真奇否

鍊丹臺

羃袂凌雲表登高望海門松曾經太古石尚記軒轅勝
蹟傳丹竈空山老白猿乘風還一至疑此是崑崙

指月庵

地偏人跡少屋對亂峰開月放千巖雪松喧萬壑雷
誦經馴虎至洗鉢篆龍來引興隨高袖長歌日幾回

登始信峰

險絕疑無路可從天然石壁引長松侵衣雲氣都成雨
應谷濤聲欲授龍夜半常聞吹玉笛嶺頭時一遇僊踪
憑君指點身親歷始信人間有此峰

桃花源散步

山園亭子竹圍門一水斜飛出遠村乘興杳然隨釣去
歸來新月送黃昏

曹 鈞

桃源曉窓

數止冰輪閣境幽心自洽竹樹森禪扉四而青山夾激
潭直見底嵒嵒巨石壓瀑轉素練披濺石飄輕雲聲可
撼山谷光復飛雷霄坐我桃源中何啻登巫峽仰視雲
間處天際孤峰插須臾幻有無峰與烟雲狎兩廡梵微

寒山萬丈氣乏竟夕未成眠林間叫石鴨

雨中坐響雪亭觀瀑布

亭子俯澄潭面面峰嵒嵒衆石繞潭踞其駕一石凸何
以肖石形儼然垂巨舌亂流趨一徑爭從舌上泄源來
不知里墜落經千折徑隘客不勝勢激恣奔決澆澗卷
白雲噴迸飛玉屑蕩汰無已時石衣盡剝落更看舌墜
處而猶碾車轍較之四隅石撞擊崩寒鐵一息騰百轉
疾馳同電掣雨復助其威山谷爲之咽天半擊孤峰盡
被烟雲截獨此素練光聲永聽不微因以名此亭確乎

若響雪

立雪臺

冷然數尺臺直倚蒼穹脚礧硤復障之一面臨絕壑北
走多奇峰千仞芙蓉削天不欲石崩危極松根縛僧曰
茲境住嚴冬益遼廓積陰寒氣浮散漫天花落瞬息老
青山宇宙悲帷幕松針繡冰線風過搖鈴鐸凜冽互冥
威春淡猶不個我欲謝人事臺上建飛閣人自逐繁華
我自探幽索赤腳踏碎玉朗誦南華作冷香沁肺脾細
雜梅花嚼堪圖瓊島遊臺下藏孤鶴駕之馳入極雲裏

立芒屨仰視青天高拳石小廬霍俯視江海淡一滴等
杯勺笑彼塵壤儔斗室困吾學至道本不寤而乃守槽
柏我與青山期青山應我諾

百步雲梯

境以險乃奇奇以寤乃勝絕壁憑溪淵無罅通遊徑誰
向半天中齒齒鑿危磴同侶顧之走盡阻登山興余也
數往還未覺力不勁尚欲週七衡百武寧束脰何處是
坦途寸心當自定

客有至桃花源不往文殊院者作以嘲之

入山不宿文殊院猶如未識黃山而舉首眼空千萬里
低頭飛瀑穿雲電任君暮慮與朝愁至此悠悠付水流
羣峰矗起疊青翠六月翻疑九月秋曹生夙耽山水癖
不惜攀援雙腳赤老大徒傷筋骨微莫把名山容易擲
君不見王侯第宅連雲起一生半老竿歌裏夜夜沉酣
金屈卮出門未辨桃與李繁華究竟誰長在空嗟塵世
同滄海古人秉燭端有期青山不變紅顏改但願予身
能不衰年年一入黃山來堪笑退之膽氣薄峰上忽生
記女哀

憩水晶庵

澄流繞屋入林清爲指禪門號水晶一道飛泉從壑引
千層曲磴幾人行全無暑氣消塵想只有松濤掩竹聲
遙望高峰烟際出此身將已到達瀛

遊雲谷禪院喜晤槩庵和尚

喜同佛子宿高真雲谷禪房松竹屏野草半經新雨綠
山峯不改舊時青躋攀已覺登三島開鑒曾疑借五丁
鐘磬悠悠林際落九龍潭下鶴聞經

鍊丹臺

丹臺尚有昔年蹟未識軒轅何處歸是水都生千仞上
無雲不在半山飛炊烟僧舍直浮戶松影夕陽亂撲衣
欲去幾回還欲住心同鷗鳥入忘機

登始信峯

已愁無路步壚巖忽有蚪松接引之天半誰扶千筍立
壑邊自起數峰支石奇只恐風能墜樹巧翻疑人所爲
莫向紅塵說異境此身不到亦難知

坐擲鉢庵偶成

去秋曾此耽幽賞今歲重來探杳濛飛瀑欲兼雙眼白

寒林忽墜一溪紅山高時覺雲能阻路盡方知樹可通
得號但言三十六龍從奚止數千峯

貪遊偏喜路盤旋此內幽奇勝剎川遠黛自能翻畫譜
長松直欲上詩肩泉香結舌何殊藥石體同人卽是僊
誰說軒輶無處覓丹爐猶遶舊時烟

亂石差牙虎豹橫石開端可放人行每疑曲徑天邊度
不信奇峰地上生幾寺鳴鐘幾寺鼓數山飛雨數山晴
拂衣欲向溪林隱丘壑真堪移世情

黃山豈如客遨遊步險休爲杖履愁苔蘚助成蒼石古

霜風吹破碧天秋，巖邊野衲披烟出。
雨後閒雲學水流，滿目贊嘆看不盡。
何須重覓入羅浮。

天門

山猿野鶴好追陪，竟日探幽踏翠苔。
曲徑欲迷逢壁合，層崖忽斷覺天開。
泉多竄竹通禪室，樹半橫溪藉石胎。
烟裏夕陽人影澹，尋詩又入白雲隈。

再遊黃山

三人黃山今又來，諸峰偏向故人開。
林深夏亦清秋序，瀑響晴猶巨壑雷。
烟雨半沈春藥井，雲霞全護鍊丹臺。

莫言竟日無多路選步應知爲惜苔

水自回環徑自分看山豈惜往來勤烟鬟黯澹將梳雨
石齒峻嶒欲齧雲曲邃若非親閱歷幽奇端不信傳聞
峰峰千仞堆寒玉初問何人運斧斤

說着看山便解頤窮巔探壑竟忘疲祇緣重到逾難盡
翻憶初來未是奇絕壁忽逢松可渡高峰時得水爲涯
數經身歷仍疑夢莫怪人間總不知

湯口程氏山樓

屋上飛泉屋下溪開窓適與碧峰齊門前便是登山路

轉過松林直向西

僊石橋

危梁虛駕接烟霄咫尺翻疑萬里遙
只有浮丘同帝子月明橋上坐吹簫

曹 鉛

雨中對瀑復觀龍潭水漲

驟雨劃然至烟霧失長空千峰蕩微影飛瀑垂玲瓏
湲湲忽怒沸疑是蛟龍宮響聲振林樾雪浪生寒風躡足
心欲動舉首搖雙瞳下觸石骨碎上與銀河通誰爲開

鑿力吾欲問洪濛

入山曉行

竹輿隨徑轉蘿薜挂烟霄石險偏橫樹溪回屢渡橋霧
收方見日雲聚卽成潮瀟灑紅塵外青山伴寂寥

入紫翠林

人多穿洞出路狹礙枯藤怪石如迎客山猿不避僧疎
林飛瀑落絕壑亂雲蒸素有登臨興梯霞上百層

白龍潭

激徹溪千尺奔騰勢若雷春潭群玉碎觸石六花開僊

已騎龍去雲猶送雨來心隨流水遠彷彿近天台

坐響雪亭

山湧濤千尺晴堆雪一溪雨隨雲去住烟接樹高低路
盡疑天逼峰尊與日齊掃苔聊獨憩摩壁好畱題

陳遜

由鰲魚洞憩指月庵登鍊丹臺

宇宙設大觀乃在黃山腹一峰一變態林巒互回複路
從鰲洞來崎嶇踏榛曲徑仄絕攀援登頓屢踣躑蹌然
出天海坦步等平陸雲清淨不生晶朗開晴旭植杖暫

息肩坡頭得茆屋一僧門外迎相揖氣肅穆挾之作導
師幽室不可燭軒皇鑄丹鼎相宅此焉卜奇松若人立
怪石如鬼搏或作瘦蛟舞或爲猛虎伏圭臬陳殿陛戈
戟列輦轂儼有百靈衛屏息莫敢竄乃知造化奇洵令
鬼斧斲頃刻萬千狀光怪搖雙目吾將嘆觀止抱雲巖
上宿盤桓不忍去同游苦相促一步一回首松聲響謖
謖山靈應待人勝遊他日續

老人峰

君不見峰上老人頭欲白空山獨立無人識
吸露餐風

不紀年惟有嶺猿伴作山中客
朝看蓮花峰頂開幕看
芙蓉雲際出蓬萊之水
幾清淺舉目雙丸空跳躑
誰云容成子漫說浮丘公
軒后昔曾求妙道藥爐丹鼎無成
功綵幢珠蓋今安在乘龍一去難羈蹤
老人乃有不死訣直與天地相始終
我來尋訪老人處老人向我無一語
笑拍肩頭問老人白雲片片歸何許
曼聲長歌萬壑開不如與君共醉流霞杯

沈述

遊黃山

縱橫三百里一氣自氤氲山勢累千戰濤聲擁萬軍
前惟見石頭上只生雲仰聽松風外泠泠若有聞

汪知默

白龍潭

卻疑秋氣盡秋向此中淺衆水皆無色空潭亦有心
清惟同月聽澹不受烟尋靜夜知何住欽哉太古音

汪舟

黃山

捫松上危徑衆山失其尊自非天都峯不敢稱第昆江

海如流泉日月爲山門生平好攀躋至此驚心魂坐久
意忽曠中心感乾坤奇觀公古今何止娛軒轅酌飲看
白雲隔澗招青猿

潭水兼山翠俯視何青青寒濤下觸石歷歷如明星蛟
龍知有無白晝常杳冥方登萬仞峯奇賞心未寧觀此
愈太息徘徊池上亭日暮天風涼孤身行海濱歸棲狎
浪樓風雷終夜聽

泉水鳴絃名飛流出石穴太古鳴至今清韻何曾絕松
林天風吹溪光野鶴悅衆響滿空山泠泠聲自別趺坐

心和平知音謝前哲

半月諸峰上平原今日始奇致積幽懷欲陳無可指老
僧扶一杖導引桃源裏曲徑臨清溪嘉樹森然起竹石
自位置山雲迎敝屣此中有茅屋築者隱君子高下無
經營頗因山水理何時謝塵事來此常棲止不必桃花
開我自尋溪水

程弘志

秋夜懷黃山

秋聲遶羣木微月生遙島涓涓澗泉鳴螢光依綠草倚

杖寂無言對月影俱啼異香來句中忽夢黃山道

由一線天至文殊院

語來人不信身到自成疑壁合知天貴松蟠遶日遲石
中驚杖履峰頂置茅茨狡獪真難測冥思結撰時
何必登壺島跣趺展玉缸石同雲欲墮峰與翠俱降孤
磬通高漢危幢控大邦只憂龍泛海排闥入僧窓

丹井

丹井烟淪古澗濱清泉滿注石粼粼凡夫莫作燒丹想
軒帝雲中欲笑人

汪晉穀

宿狎浪閣

亂石藏幽室尋源吸玉虹孤燈松影裏半閣水聲中冷
夢驚晴雨空山幻海風不須真狎浪身已寄巖宮

文殊院

山水平生癖於茲獲一償望來天尺五宛在海中央笑
鵲無高志悲雲處下方言歸真不欲倚杖恣翱翔

黃山

豈獨石奇古松雲各有情山中無弱水舉步見蓬瀛

帝松固奇絕餘亦盡如龍旦暮雲鋪海飛潛無定踪
世間希有事天子又神僊秦漢多方士無緣浴異泉
亂石劈爲筍龍孫直刺天分明排竹箭萬弩各離弦

吳樹誠

秋雨宿祥符寺

獨宿空堂上一燈忽明滅階前雨如傾狂風亂桐葉鐘
磬靜不聞寒氣直侵骨天地何寥寥萬物此俱歇愁思
縱橫生起坐竟終夕老僧歸叩門開戶已微白

程兼

山石筍石達松谷訪諸名潭

海盡無奇觀取道下松谷怪石忽接天驚我一回目愛
茲幽境溪穿水緩踰出溪見清潭遙沈山影綠雨氣
正霏微羣峰翠若沐投庵杳無人舉火賴我僕入村覓
酒漿僧知忙歸宿亦來相對飲助我以蔬藪雲斂月更
明醉起看脩竹

洋湖岡

百道流泉落遠巒日光遙映水光寒遊人未到洋湖上
漫說三秋瀑布乾

汪士鉉

坐玉屏望天都峯

置身真巖壑身與山俱尊遙昔思維及皆非理所存壁
削自有故岫聳疑無根雲烟倏忽來松泉相吐吞風爲
山驅除俯矚雲烟奔羣山甘在下拱揖如兒孫尊嚴式
臨之地渤連崑崙鬼斧不敢施飛躍聞普門苔蘚厚數
尺五色畱古痕天高散空香習習清心魂排蕩太虛中
靈氣何胚渾恨無羽翰生跼蹐悲乾坤願言此靜觀望
古懷軒轅

蓮花峰

天嶂臨萬象，鳥道棧秋毫。漸覺諸峰低，乃知所歷高。雲根澀石齒，斂屐懸崖牢。靈光紛顧盼，空巖奔風濤。練影指江湖，往來看猿猱。雨丸峽際飛，萬古何勞勞。披襟御倦颺，天半相翔翱。容成或可招，中心殊鬱陶。

天海遇雨過石鼓庵

朝暾照峰際，探討殊從容。俄瞬旭光熿，霏微隱芙蓉。雷聲捲大壑，雨在巖底峰。遙望蓮岫雲，已接天都松。階巔叩蘭若，頓覺飛霧濃。猶聞儕侶聲，烟中尚扶筇。庵僧餉

客勤爲作伊蒲供，飽罷錯昏晝。星星待夜鐘。

下白沙嶺宿擲鉢禪院

荒徑渺難臻，沙浮跼微步。澗流趨正絕，荆榛眩迴顧。隔崖鐘磬聲，冷從白雲度。扶筇一翹首，見松不見路。颼颼風滿林，日午竟如暮。撥雲問精廬，貼石飛瀑布。晏息向山房，竹香染衣屨。仰見擲鉢巔，依稀新月吐。一點空明中，峰峰光影赴。肅然響梵音，孤衷有淡悟。

海門峰望鋪海

望海門，海門離奇不可測。萬峰攢聚一壑中，朝曦蕩漾

蒼色寒風聚起生怒號遠見流雲忽如織後雲不逮
前雲隊前雲時借後雲力須臾見雲不見山到處茫茫
蕩胃臆延頸四望徒心悲精神寂寞於斯極

晚過雲谷

領畧秋光付短筇遙尋孤寺一聲鐘每於絕徑開幽徑
時見奇峰出亂峰鸞鶴半隨雲腳過猿猴多向石心逢
攀躋莫悵遊踪晚寂寂斜陽下萬松

黃山道中

我家到黃山百里聽啼鳥鳥聲忽然無始見山縹緲

狎浪閣

高閣臨溪水薄暮軒窗開望見庵中僧微雨下峰來
凌雲道中

不敢避風雨披烟支一筇流雲不相待先上天都峯

玉屏峯月夜

玉屏一片月光照石巖秋巖上松萬株涼風吹不休

登蓮花峯

捫蘿入蓮花步步流雲裏昨指最高峰今在芒屨底

雲谷

上山入層雲下山履叢竹雲漢竹亦漢竹盡見茆屋

宿飛白草堂

山月寒於澗底水一龕燈影對孤僧夜來還作遊僊夢
夢到天都最上層

玉屏晚望待榛公不至

洞口無人山鳥飛寒烟一縷篆香微遊人薄暮倚松立
眺盡落霞僧未歸

望僊峰

丹楓一壑染巒容步步泉聲繞客筇忽到望僊崖斷處

亂雲堆裏數寒峰

程謙

湯泉

絕壁日涓涓一泓開石泉
煖餘丹竈火清帶碧山烟
苔淨心同潔沙香骨欲僊
野人塵事少浴罷竟忘還

坐桃花源亭子看白龍潭

空潭深莫測俯視影粼粼
終古疑風雨青天泣鬼神
山鐘聽過寺澗石立如人
坐向虛亭久悠然遠世塵

禮慈光寺有感

寺爲于丹黃翁新建

寺群峰得登臨嘆昔賢嗟我知此日疏鑿是何年
注雨挂晴壑香風開木蓮黃金容易散誰肯學神僊

由朱砂庵至老人峰

路由山樓外僊蹤此際分一峰青接日萬壑綠生雲拱
立如相引低徊樂有群坐來心境寂猿鳥亦無聞

從小心坡登文殊院

竟日扶雙策登登上翠微松多穿石出雲喜傍人飛
造物近無理勞生欲息機後遊當努力踏遍萬峰歸

汪洪度

與弟歸始信峰草堂作

盤盤萬仞山雲外峰巒攀援去路盡孤松半空橫因
松以爲梁麋鹿來引人長嘯最高頂四顧廓無垠我性
喜峻極魂夢託孤清選勝得奇峰徜徉終吾生

龍門百尺桐泰山孤生竹刈取嶽瀆材峰頭結茅屋雖
未出人境幸已遠塵俗長眉一老僧念我苦幽獨時把
青蓮花松間來共宿

千章如龍松巘嶽碧山頭根不憑泥土生誰記春秋松
身與石骨萬古如漆膠野鶴不能棲飛飛空逗遛獨許

冰心人歲寒爲好迷六月鵬翅息八月雷聲收乾坤氣
凝近遲暮吾何憂

古洞長陰森中有僊猿居身青鬚顏白鬚錄千歲餘每
當春莫時百花開山隅瀼瀼花上露采顙爲醒酣我來
同飲啜美味天下無何須千日酒身已遊華胥

兄餐沆瀣氣弟著薜蘿裳衣食不干人晞髮鴻濛鄉飛
泉幾千丈天矯懸崇岡曲折亂分散古澗流湯湯澗上
多菖蒲九節鬱青蒼花開盡紫色采采當朝陽

伊昔寒江子振衣登此峯羣峭高插天顧盼抒心曾遊

將謝人寰白首棲山中天傾地崩塌日月無光容殺身
殉國難血灑衣裳紅名未垂青史氣已滿蒼穹伊子入
山來緬想雲鶴蹤題字苔蘚蝕一見心如春

有熊握大象戡亂以白刃虎豹遠遁藏天下翕然定功
成投雲峯丹砂鍊真性卽今鍊丹處雲物一何勝龍額
去不返悵望眼淚迸盤石坐秋宵海月來照映萬壑風
吹葉漸歷響清聽

冉冉石上雲出岫猶依微須臾成溟渤盪激遍兩儀蛟
龍出其中變化無端倪散作人間雨萬象生意滋吾廬

落花片浩蕩天風吹飛瓊騎白鳳子晉驂文螭紛紛拍
掌笑招我登瑤池歲月任流駛朱顏終不移

吳苑

遊石門

黃山山剉奇至奇尤在水取徑荒榛間石門遊伊始空
翠落古潭微雲相屬委光影澹留懷一泓清瀾瀾石色
備采絢泉光亦復爾雲荒路彌綢絕壁半空峙故懷樂
孤往領畧凡數里遠空微有曉端倪無可指天地抑何
私異境偏鍾此余意欲誅茅一榻依潭徙細探潭水奇

補入茲山史

吳蔚

鍊丹臺

黃帝丹成處遺踪有古臺亂峰次雨過絕壑捲雲來松
老不知歲山奇何日開遊人談往蹟聽罷意悠哉

吳之騄

桃花源

青鸞飛不去昂首空天寒神遊九霄外萬象聳殊觀茂
林振清籟巨石激懸流洞壑一以開徑路空復盤披襟

陰叢桂解佩結幽蘭築室似太古道心靜始安

湯泉

鼎湖上僊去空谷留瓊漿萬絲環清溪一水別溫涼地
湧丹砂浪泉烹石髓湯故知神僊窟穴龍發其祥浴身
兼浴德塵穢除膏肓洗耳臨清風暗髮望朝陽山頭有
笙鶴吾意與翱翔

文殊院

絕壁蚪龍臥綠椳石罅開耳目忽超曠松際天風來薤
薤紫玉屏前有文殊臺俯視萬山伏蒼茫混沌回天都

倚空立蓮花根未栽顧盼當左右形勢俱欲推把臂呼
山靈賞心復疑猜

登蓮花峯頂

懸崖一萬仞天際芙蓉開猿鳥不敢上僊人時往來呼
吸衆山響丘壑藏雲雷逝將乘風去不復畱形骸日月
雙丸在乾坤飛劫灰茫茫大塊中獨立空徘徊

鍊丹臺

翠巖環相對丹臺敞山麓身若無僊骨安得此追逐紫
石盤蒼松壁立俯幽谷奇峰插天半下如絕地軸桂嶺

太無情形象盡駭目探奇不欲返神動氣俱蕭芝木已
在手願抱彩雲宿軒轅招欲出授我神僊籙

宿松谷庵緣接引松登始信峰

空山烟火絕日暮鑽柴桑

鑽柴取火作火食也

經行僧戶閉掘地

得餘糧雲嵐無定姿變幻當斜陽鑿石巨靈手取像非
荒唐峯斷不可度接引松在旁縱觀造化理開闢歸穹
蒼

觀九龍潭瀑布

名山無鈍水高下恣奇探九級飛泉落青峯響綠潭羣

龍挾巨浪迅激當晴嵐漫空捲霜雪上與孤雲參珠玉
凌空墮島嶼此中涵夙昔夢姑射旣覩神愈酣悠然結
遐想築室南山南

程 彭

遊黃山

少小離故鄉忽忽三十載鬢髮已婆娑容顏亦漸改所
遇日甯戀年華難久在歸尋黃帝踪採摘入雲海丹井
尚依然怪石何磊磊高駕不可親徘徊如有待

飛鳥鳴空谷遊魚親萍藻物類有自然各隨性所好朝

惟豈不榮日暮還自槁心與道爲期何須志溫飽平生
慕茲山寤寐深懷抱青青木蓮花垂垂雲霧草去去樂
何極願言此終老

入洞氣冥漠過壑趣多端石破出松樹風落身上寒晴
日看猿舞雨漲龍潭寬鬱鬱萬峯裏鸞鶴見人歡登臨
忘險巖時忽臥層巒人間重金玉至此成清歡

蔣質

丞相源

溪盡源斯得逶迤石逕斜嶺雲寒似鍊崖草亂開花殿

閣連松雨田園墾石砂余將修淨業到此欲忘家

江注

登蓮花峰

探奇上高巘不知花瓣危忽坼識來徑剗削誰能窺屢
息存一息非復筇可支攀躋恃腹膝手足失所司絕頂
一磅礴天風吹人衣彷彿見三山霞鬱紛四垂狂來不
暇咍自將鋏笛吹嗒然忘故吾天地乃如斯僊遊亦俄
頃景斜難久稽欣懷託孤往浩渺無端倪

望翠微峰

峰似當空立尊雄儼不群風松飄積翠雷樹帶斜懸陰
處間埋雪虛中解斷雲何時乘鶴轡長往坐氤氲

黃起復

望爛柯峰

青峰如瑤林矗矗排高空有何二僊客坐隱青林中千
春若流水一局猶未終得非容成子對席浮丘翁顧視
世間人擾擾何匆匆不肯早學僊年壽如秋蟲我來遊
名山追躡鸞鶴蹤永願爲僕隸給事軒轅宮僊老或我
哀肯下千仞峰

狎浪閣

風波爲客慣飄泊任孤舟不意到青嶂此身同白鷗晴
雷轟石底飛雨挂簷頭禪榻中宵靜虛疑在舵樓

文殊臺看鋪海

纔入清涼境陰霾一霎收雲腰拖素練日腳走金蚪海
氣虛生白波聲澹不流秦皇勞遠駕此地有滄洲

黃山

地閤僊人宅名高天子都迴杓侵北斗展翅礙陽烏刻
畫煩靈掌陶融費大鑪雲根疑欲動地軸恐難扶形勢

楚風烟迥入吳翠微分郡縣白練帶江湖下界陰
晴變山中氣候殊挂猿啼娘舅飛鳥度踟躕玉液延年
用升砂服食需紅泉經窈窕青壁歷崎嶇軒后乘龍上
浮丘控鶴俱石牀猶有枕巖草尚畱鬚內景琴三疊眞
文記五圖不須探响屨何事訪蓬壺咫尺雲門近羣僊
拍手呼

文殊院

亂雲堆裏結孤茅雲作齋糧石作巢老衲有時閒不得
數聲清磬落松梢

山中懷古

紫牀碧枕依然在龍駕霓旌不可尋
一自丹成上昇後空山畱姓到如今

吳荃

雨發祥符寺

千巖時隱現石罅雪漫漫飛瀑爭趨壑
崩雲亂下灘鐘聲經霧濕人影入松寒
回首棲禪地蒲團僧夢安

由老人峰至文殊院

磬折纔通頂蒼穹手可捫人行空翠上
僧出亂雲根一

線開天闕雙峰夾寺門
時聞笙鶴過丹井問軒轅

天都峯

旭日天都頂
悠然獨立時
天風吹杖屨
雲影淨鬚眉
閱險心能細
躋奇徑不危
白猿迎客至
一揖是吾師

吳松

黃山松

六六金芙蓉
觸處落空翠
天矯多奇姿
抱石紫薜荔
詭譎繭開鴻
漾結根露靈闕
屈曲蛟螭脊
蒼皮風雨至
大者不數圍
小者盈尺計
拳腹與短髯
點石真椎髻
飛舞常

盤空奇與峰角勢夾道列爲門斷崖枝相濟接引共蒲
團造物非無意更聞始信峯擾龍尊爲帝奇崛橫一枝
曳練垂空際大夫恥受封處士何足異青蒼日月寒窮
窕煙霞蔽鱗老不記年容成時所憇

桃花源坐雨

急雨潭聲勁陰崖見日稀樓原因石構瀑不擇峯飛鳥
道盤青嶼樵歌出翠微孤亭看響雪終古萬山圍

由疊嶂峰望仙榜峯

曾有道人辨數字雷卽擊去
結語故云

綠字垂千古軒皇定有書古今無復辨片石竟何如蜥

斜看明昧煙雲任卷舒羽衣傳劫火卽此是焚餘

吳瞻泰

初入黃山

雙嶺峰平時登躋一杖勞空青生曉日寒翠落松濤鳥
語移時換灘聲百里高到來人境絕吾意欲謀茅

白龍潭

拾級登初地驚濤洞口分疑飛三峽雪散作一溪雲萬
籟翻俱寂孤亭靜有聞真龍應出沒我自狎鷗羣

松門

山游最愛松門路，疊嶂峯前兩松樹。
攫拏夭矯勢千尋，老石松根莽回互。
松幹如鐵石轉柔，廻環共歷幾千秋。
種松諒是軒轅氏，更向天都拜冕旒。

程義

一線天

石破支雲上，雙峰一道開。
秋陰疑雨過，日午識天來。
松影沈千仞，花香落半臺。
遊踪驚歷歷，尚有古莓苔。

登蓮花峯

松濤雲瀑裏，仰望碧陵巒。
亂石穿空上，三峯少客登遙。

天滄海水明月雪山銚直欲凌風去狂來我獨能

閔麟嗣

送息心上人之天目省侍本師玉林大師迎其卓

錫黃山

息師禪家秀願力超龍象養愚蒼翠中問法千峰上林
花生道心江月隨藤杖此身如孤雲飄然任來往

賜像將露處祇園纔布金琳宮與疊嶂氣勢爭千華輪
奐臨丹壑瞻依出遠林遙酬古德志仰見前王心繞佛
試三匝明明師念淺

相送過江僧秋鐘空外度野寺足徘徊愛倚婆羅樹飽
看廣度濤往聽天目雨寂然坐澹松脉脉欲無語

差幾天目山怪石霞端矗側聞衆峰巔僅及黥山麓中
有老比丘白雲媚幽獨性愛漸江清曾向蓮花宿山月
至今明禪燈如已續安得迎錫飛宗風振芳谷一言洗
我心勝入溫泉浴